

ANG PAGPANAKUP SA ESTADOS UNIDOS



...mahitabo usahay ang pipila ka mga butang sumala sa kabubut-on sa Gino. Miadto mi didto sa Denver, bag-o lang, ug mibalik ra pud. Nagatoo ko nga kinahanglan kong ipahibalo, ang bahin niadtong panagtigum: Usa kadto sa pinakamaayo nga mga panagtigum nga akong napahigayon sulod sa daghang mga katuigan. Nagkaaduna mi'g usa ka makahibulongang panahon. Mga kapin duha ka libo ang nagtugyan sa ilang mga kasingkasing ngadto kang Cristo, gawas pa niadtong nakadawat og bautismo sa Espiritu Santo, gawas pa niadtong mga dagkung ilhanan ug mga katingalahan nga gibuhat sa atong minahal nga Ginoong Jesus taliwala sa mga tawo didto sa Denver. Nagkaaduna mi'g usa ka makahibulongang pagbubo, ug usa ka daku nga panagtigum sa mga tawo. Nagsugod mi sa mga lima ka libo, sa pagsugod. Ug giabangan namo ang Mammoth Gardens. Ug sa ikatulong gabii, wala na'y igong luna nga matindogan sa mga tawo sa maong dapit. Nagmalipayon gyud kami, niadtong lima ka gabii.

² Migikan mi didto, paingon sa Canada, ang akong anak ug ako. Ug samtang nagbiyahe mi sa kabukiran, nakasugat mi og bagyong niyebe. Tingali nakadungog mo bahin niini, sa inyong radyo. Ug gibanabana nga usa ka gatus ug kawaloan ug walo ka mga tawo ang namatay tungod niadto. Ug natanggong mi didto sa pinadpad nga mga niyebe sulod sa—sulod sa—sulod sa pipila ka mga adlaw, didto sa kabukiran. Ug natapos na lang ang among pagatambongan unta nga panagtigum, ug kinahanglan namo nga, mopauli na, bag-o mi makalakaw na pud. Kami nagtoo nga tingali kadtong tanan nahitabo sumala sa kabubut-on sa Dios, aron kini mamahimong usa—usa ka mas maayo nga panagtigum, ug alang usab sa uban nga katuyoan. Aduna siguro Siya'y gitagana para kanamo nga wala namo mahibaloi.

³ Nagalakaw kita sa daw sa usa ka mangitngit nga kalibutan, apan dili sa kangitngit. Nagasunod lang kita, samtang nagauswag ang Kahayag, dayon nagasunod kita sa Kahayag.

⁴ Ug ang Langitnon natong Amahan tingali adunay giplano nga wala nato mahibaloi. Mahimong adunay pipila ka peligro nga nagahulat didto. O, sa makausa pa, mahimong nagapamuhat Siya sa usa ka tawo aron makatambong didto. Kita n'yo, puede ang Dios manglihok diha sa usa ka tawo nga sama niana; nga Iyang usbon ang tibuok nasud para lang nianang usa ka tawo, aron madala sila. Ug busa nasayod kita nga kining tanan alang

sa maayong kahimayaan sa Dios. Ug ginapasalamatan nato Siya tungod niini, ug sa pagpanalipod kanamo. Ug dihay daghan, kami. . .

⁵ Mitabang kami ni Billy nga kuhaon sila, sa daplin sa dalan ug ingon niana nga mga butang, nga mga tawo nga naaksidente ug tanan na. Bisan pa niana nakaagi mi nga walay problema. Adunay usa ka higayon nga nadigyas mi pagawas sa dalan, apan kadiyut ra kadto. Ug adunay usa ka tawo didto, sa usa ka ranso nga mianha ug gibira mi pagawas gamit ang usa ka traktor. Nadausdos gyud mi; kay danlog kaayo.

⁶ Ug kini usa sa mga butang nga wala nila masinati kaniadto. . .ngani, ang mga katigulangan dinhi wala makahinumdom nga adunay nahitabong unos nga ingon niana, sa niadtong probinsya, nianang panahona sa tuig, didto sa Roundup, Montana. Ug kami. . .Nasayod kita nga pag-adunay ingon ka grabe nga panghitabo nga sama niana, ang kamot sa atong Ginoo anaa gyud nianang dapita. Para kadto sa usa ka katuyoan, nga para sa—para sa atong kaayohan. Para sa atong kaayohan, mao kana ang katuyoan niini.

⁷ Ug mao nga gitawgan ko si Igsoong Neville, niadtong nakabalik na ko, ug miingon ko, “Makauli na ko sa Dominggo. Ug—ug kung gusto nimo, nga moanha ko diha ug mao’y modumala sa Sunday school, aba, okey ra kana kanako.” Ug miingon ko, “Dayon akong. . .ug malipay gyud kaayo ko nga makatambong.”

⁸ Ingon niya, “Aba, sige, Igsoong Bill.” Miingon, “Malipayon mi kanunay nga moanhi ka,” uban sa mainiton ug bukas nga kasingkasing ug pag-abiabi, nga sama niana. Ug dayon iya kining gipahibalo sa iyang programa sa radyo, kagahapon. Busa mapasalamaton gyud mi niining tanang mga butang.

⁹ Ug niining buntaga, karon, ingon nga Adlaw sa mga Inahan. Kadaghanan sa mga tawo, madungog ninyo ang mga wali mahitungod sa Adlaw sa mga Inahan bisan asa, ug ang mga tawo nagahisgot bahin sa inahan, nga sa hunahuna ko maanindot gayud. Ipadaplin sa nato kana sa tibuok panerbisyo.

¹⁰ Karong buntaga ako nang gipahibalo, ang, usa—usa ka hilisgotang *Ang Pagpanakup Sa Estados Unidos*, nga mao’y akong gusto ipamulong. Nga, lagmit nakadungog na kamo niini sa inyong mga sibya sa radyo, ug daghan mong madungog nga ingon niini karong adlaw. Ug magkaaduna og usa ka sermon para sa Adlaw sa mga Inahan, basin, sa mga panerbisyo unyang gabii. Ug busa nahunahuna ko, nga karong buntaga, akong igapamulong, “ang—ang maong pagpanakup.”

¹¹ Gipamulong ko na kini didto, sa Denver, apan dili eksaktong pareho sa paagi nga akong gitinguha nga igapamulong kini karong buntaga, kung itugot sa Dios. Ug, kadto, nalipay gyud

mi niadto. Nagpanalangin gayud ang Ginoo sa talagsaong paagi. Medyo nagahatag kini kanato usahay og usa ka . . .

¹² Kinahanglan nimong mayugyug usà gamay, aron masabtan nimo kung para gyud sa unsa kini tanan, dili ba, usahay? Ug nagaampo kita nga ipahinabo kana sa Dios.

¹³ Ug, lain pa'y ako, didto, niadtong nahuman na mi . . . Ang Business Men sa Denver mao ang nagpasiugda sa maong panagtigum, ug medyo lahi kadto nga pagpasiugda kay sa nadawat ko kaniadto.

¹⁴ Ug kasagaran, ang mga ministro, pag sila ang magpasiugda sa panagtigum, moingon ka . . . “Gipahibalo na ba nimo kini?” “Oo, sa iglesia.” Ingon-ana lang. Ingon-ana ang magbalantay; gusto nila nga mahibaloan kini sa ilang panon. Sakto man kana nga tubag. Responsibilidad man nila kana.

¹⁵ Apan medyo lahi ang mga Business Men. Gusto nilang ipahibalo sa kalibutan ang bahin niini, maong mogasto gyud sila og mga tulo o upat ka libo ka dolyares nga kantidad sa pagmantala aron maibutang kini didto sa tanang mga sakyanan, og mga taxi, sa tanang bumper sa mga sakyanan, ug bisan asa. Ug nagkaaduna kami'g usa ka talagsaon nga kahigayonan.

¹⁶ Pagkahuman sa buluhaton, gitawag nila ako sa usa ka kilid, miingon, “Igsoong Branham, unsa ma'y among mahimo para kanimo karon? Unsay among utang kanimo?”

¹⁷ Miingon ko, “Aba, siyempre, wala.” Miingon ko, “Wala mo'y utang sa ako.” Miingon ko, “Kamo na, ang mobayad sa akong bayronon sa hotel, dinhi, kung gusto ninyo.”

¹⁸ “Oh, gusto namo nga aduna kami'y mabuhat para sa imo.” Ug wala gyud sila . . . Dili man gud ko gustong modawat og bisan unsa gikan kanila.

¹⁹ Busa gitawag sila niadtong manedyer. Ingon niya, “Sa nahibaloan ko ganahan siya nga mangayam ug mangisda, dili ba?”

Ingon niya, “Oo.”

²⁰ Busa ang usa sa mga negosyante nga adunay usa ka ranso didto, ug ingon niya, “Mao na lang diay kana ang akong iregalo kaniya.”

²¹ Bueno, miadto si Mr. Moore aron tan-awon kadto. Kinahanglan pa niyang mobiyahe og mga traynta ug lima ka milya, sakay sa kabayo. Miingon ko . . . Ingon ni Mr. Moore, “Gusto kong makita nga nakasakay si Igsoong babayeng Branham sa usa ka kabayo, sa pagbalik didto.” Busa siya, sila, ug . . .

²² Pero, pagkahuman niadto, nahitabo, nga miadto sila sa usa ka homestead nga lugar didto sa Silver Plume, Colorado. Mora'g tua kini didtong dapita. Ug mipalit sila'g gamay'ng

ranso didto, ug nagtukod na sila og lima-ka-lawak nga balay didto para kono kanako aron . . . didto sa Silver Plume, Colorado, nga anaa sa tunga-tunga mismo sa kabukiran. Busa, kamong mga mangingisda, siguro maayong kahigayon kini, mao nga mahimong maayong lugar kana para makapahulay, ug labi na inig human sa mga panagtigum ug ubang kalihokan, kon itugot sa Dios. Nagdepende ra kana Kaniya, kita n'yo.

²³ Gusto ko nga itutok na nato karon ang atong pagtagad diha sa Pulong. Ug gusto ko gayud ang Pulong, ang buhi nga Pulong sa Dios. Tungod kay, anaa sa sulod sa Pulong ang Kinabuhi. Karon, “Ang Pulong, ang letra, nagapatay, apan ang Espiritu nagahatag og Kinabuhi.” Ug ang Kinabuhi anaa sa Pulong, tungod kay Pulong kini sa Dios. Ang kinabuhi anaa sa Pulong Niini.

Pananglitan gisulti ko sa inyo, “Hatagan tà ka . . .”

²⁴ Ingnon n'yo, “Gigutom ko, karong buntaga, Igsoong Branham. Mahimo bang hatagan mo ako og lima ka dolyar?”

²⁵ Ingnon ko, “Sige hatagan tà ka.” Karon, ingon niana ra pud kana ka buhi sama sa akong saad.

²⁶ Ingon niana usab sa Dios. Pagnagsaad ang Dios og bisan unsa, nan kung unsa ang Dios, Iyang . . . Kinahanglan nga anaa gyud Siya sa Iyang Pulong. Kita n'yo? Ang bili niining Pulong . . . Kini nga Pulong sama ra usab sa Dios. Ang Dios Kini mismo.

²⁷ Ang imong pulong mao'y kung unsa ka. Kini ang imong garantiya; mao kana'y tawag nato niana. Ang imong garantiya mao ang imong pulong. Kung dili namo matoohan ang imong pulong, nan wala ko'y ingon nga pagsalig. Pero kung matoohan nako ang imong pulong sa bisan unsang butang, nan ikaw usa ka tawong may kadunganan.

²⁸ Ug miingon ang Biblia, “Sa sinugdán mao ang Pulong, ug ang Pulong kauban sa Dios, ug ang Pulong mao ang Dios.” Kita n'yo? Kita n'yo? “Ug ang Pulong nahimong unod, ug nagpuyo ipon kanato.”

²⁹ Kung hunahunaon nato, kining, mismong yuta nga atong ginapuy-an, karong buntaga, mao ang Pulong sa Dios. *Kana* nga kahoy mao ang Pulong usab sa Dios. Ug ikaw, ang imong lawas, mao ang Pulong sa Dios. Gilitok kini sa Dios aron motungha sama niana, nga gikan sa wala; diin wala pa gyud kini kaniadto.

³⁰ Inyo bang namatikdan ang kinabuhi sa tawo, kon diin kini naggikan? Usa ka gamay nga selula, gamay kaayo nga dili gani kini makita sa mata sa tawo; pinaagi lamang sa usa ka kuyaw, gamhanan nga mikroskopyo. Ug gikan niana migula ang usa ka gatus-ug-kalim-an, duha-ka-gatus-ka-libra nga tawo. Asa man kini naggikan? Kita n'yo? Gilitok lang kini sa Dios, ug basta na lamang misugod kini, pinaagi sa kinaiyahan, nga mitubo, ug namunga kini sa eksakto gayud. Gilitok Niya ang matag kahoy, ang tanan, aron motungha. Ug kini usa ka matahum kaayo,

kahibulongan nga butang, karong buntaga, nga makita nato ang Pulong sa Dios.

³¹ Karon, niining, niining buntaga, diha sa Daang Tugon, ablihan nato sa Mga Cronicas. Medyo gikapoy lang gyud ko. . . Og samtang nagaabli kamo karon diha sa Mga Cronicas, sa ika-18 nga kapitulo. Medyo gikapoy lang. Apan kon itugot sa Ginoo. . .

³² Dili ko sigurado; ato pang mahibaloan ang uban sa Miyerkules sa gabii. Kon itugot sa Ginoo, ug kung gibati sa iglesia nga gipangunahan kini sa ingon niana, gusto kong magpahigayon dinhi sa Miyerkules, Huwebes, Biyernes, Sabado, ug Dominggo, og usa ka rebaybal dinhi, usa lamang ka pagpanudlo nga rebaybal gikan sa Pulong. [Nagaingon ang kongregasyon, "Amen."—Ed.] Miyerkules, Huwebes, Biyernes, Sabado, ug Dominggo, pagpanudlo lamang sa Pulong; dili mga panerbisyo sa pagpang-ayo, kondili pagpanudlo. Tingali ang Ginoo mogiya kanato sa nianang direksyon. Ug dayon kita. . . Ganahan kaayo ko nga makig-uban kaninyo ug makig-ambitay sa Pulong, uban kaninyo. Salamat, kaayo, alang nianang maanidot, ug matahum nga "amen."

³³ Karon, sa ika-18 nga kapitulo sa Mga Cronicas, ug sugod sa ika-12 nga bersekulo, gusto natong ibasi ang atong mga hunahuna, sa makadiyut lamang niining importante nga hilisgotan niining adlaw. Unang Mga Cronic-. . . , o, Ikaduhang Mga Cronicas, pasayloa ko, Ikaduhang Mga Cronicas 18:12, ug basahon nato ang usa ka bahin niini dinhi, ug tan-awon nato kung unsa ang gusto sa atong Ginoo nga atong mahibaloan.

Ug ang mensahero nga miadto aron sa pagtawag ni Micheas misulti ngadto kaniya, nga nagaingon, Tan-awa, ang mga pulong sa mga propeta nagpahayag og maayo ngadto sa hari uban sa usa ka pag-uyon; busa tugoti nga ang imong pulong, ako naghangyo kanimo, mahisama sa usa kanila, ug mosulti ikaw og maayo.

Ug si Micheas miingon, Ingon nga ang GINOO buhi, bisan unsa ang gisulti sa akong Ginoo, kana ang akong isulti.

Ug sa diha nga siya miabot ngadto sa hari, ang hari miingon ngadto kaniya, Micheas moadto ba kami ngadto sa Ramothgilead aron sa pagpakiggubat, o kami mopugong? Ug siya miingon, Tungas kamo, ug pag-uswag, ug sila igatugyan nganha sa inyong kamot.

³⁴ Karon, sa pagbasi nato sa atong panghunahuna sa pipila ka mga minuto; usa ka pulong usa ngadto Kaniya pag-usab, mahitungod niini.

³⁵ Langitnon namong Amahan, uban sa mapasalamaton nga mga kasingkasing nagaduol kami Kanimo karon, alang sa nahisalaag nga mga kalag, alang niadtong mga nanginahanglan,

alang sa iglesia. Hinaut, nga ang Balaang Espiritu karon mosulod sa gilayon diha sa Pulong, mao'y among ginaampo. Dad-a Kini diretso mismo ngadto sa matag kasingkasing dinhi nga adunay panginahanglan. Ug sa diha nga Iyang ihatud ang Iyang Mensahe sa gahum sa Pulong ngadto sa kasingkasing, hinaut nga kami motubo pinaagi Niini, karong buntaga; mamauli, gikan niining tabernakulo, nga nagamaya ug nagadayeg sa Dios, nga nagaingon, "Ang atong mga kasingkasing nagdilaab gayud sulod kanato, tungod sa Iyang Presensiya." Kay among ginapangayo kini sa Iyang Ngalan. Amen.

³⁶ Nakabasi ang atong esena, karong buntaga, sa usa ka trahedyo. Ug ang Daang Tugon, alang kanako, kanunay usa ka anino o usa ka—o usa ka panagna mahitungod sa Bag-ong Tugon. Daghang mga higayon, nga adunay mangutana, "Igsoong Branham, nganong kanunay man nimong ginahisgotan ang Daang Tugon? Halos kanunay gyud, pagmokuha ka'g teksto, mobalik ka sa Daang Tugon." Ginabuhat ko kini tungod kay ganahan ko nga nagatipo. Ganahan ko. . .

³⁷ Ang akong edukasyon limitado ra gyud, sama sa nahibaloan sa tanan. Ug ang bugtong paagi aron akong mahibaloan nga haduol ako kung unsa ang ensakto, mao ang pagsunod sa sumbanan, ang magdangup sa bluprint ug susihon kung unsa kini kaniadto. Ug dayon pagmahibaloan ko kung unsa *kini* kaniadto nan mamahimong susama ra *kini* sa karon, tungod kay kini landong ra man niini. Ug kanunay kong ginabalikan ang Daang Tugon aron makita kung unsa ang gibuhat sa mga anak sa Israel, makita kung unsa ang silot sa sala kaniadto, makita kung unsa ang hustisya sa mga propeta kaniadto, tan-awon kung mahitungod sa unsa ang tanang mga butang kaniadto; ug dayon magkaaduna na ako'g ideya kung unsa *kini* karon, tungod kay kini kaniadto gihulagway-nang-daan kung unsa ang kinatibuk-ang mahitabo niini sa katapusan.

³⁸ Niadtong panahona, adunay dakung butang nga nahitabo sa Israel. Atua kini sa kangitngitan sa tungang-gabii.

³⁹ Sa Daang Tugon, kon itugot sa Ginoo, tingali sa umaabot nga mga panerbisyo, gusto kong ipakita kung giunsa pagtipo ang Pito ka Kapanahonan sa Iglesia diha sa Daang Tugon. Kung unsa nga nagsugod sila kaniadto sa paagi nga susama gayud sa—sa pagsugod sa Mga Kapanahonan sa Iglesia sa iglesiang Gentil, ug miagi sa susamang kapanahonan nga mangitngit, ug miabot ngadto sa mahimayaong panahon sa Pentecostes, niadtong pagbubo sa Espiritu Santo sa unang iglesia sa. . .sa panahon pa sa Judiong dispensasyon. Dayon miagi na sàb og laing panahon sa Gentil nga iglesia, sa usa ka mangitngit nga kapanahonan, ug dayon mipaingon na usab ngadto sa Milenyum, sa katapusan.

⁴⁰ Karon, niadtong tungatunga nga mga katuigan, kadtong bantugan nga hari nga si Ahab nakalingkod sa pangamhanan. Ug medyo nakapahimulus siya sa dungog sa ubang mga hari sa Israel, nga kaniadto usa ka . . . Si Ahab, mismo, medyo usa ka—usa ka hangtud utlanan lang nga magtotoo. Kanunay nako siyang ginahulagway nga ingon niana, tungod kay kabahin pa man siya sa panahon sa *niini* nga bahin sa koral, og kabahin usab sa panahon sa *niana* nga bahin sa koral.

⁴¹ Dili gyud nimo mahibaloan kung asa nagbarug, ang usa ka tawo nga palingpaling nga sama niana. O, usa ka tawo nga nag-angkon nga usa ka Cristohanon, ug ingon—ana ka palingpaling, dili gyud ka kabalo kung unsa’y imong buhatan bahin niana nga tawo. Mga Cristohanon kono sila karong adlaw; pagkaugma wala na ka kabalo kung hain na sila. Sa simbahan karong adlaw, nagamaya ug nagaawit ug nagadayeg kono sila sa Dios; dayon pagkaugma, nagainom—inom na sa gawas, nagahudyaka, ug nagalibodsuroy. Malisud gayud mamuhat sa ingon nianang klase nga tawo.

⁴² Nahinumdom ko, niadtong bata pa ko, naa mi’y usa ka—usa ka kabayo, nga kanunay nga nagaipsot sa mga koral. Ug nagtoo ko nga daghan kaninyong mga kalalakin—an, nga mga kadedad ko, makahinumdom pa niadtong panahon sa mga kabayo, panahon pa sa karwahe. Nakasulay na ko sa daghang mga higayon kaniadto, dinhi mismo niining dalana, nga nagdala ko’g karwahe nga giguyod sa kabayo, ako mismo. Kwarantay—singko na ko. Busa sila . . . Nahinumdom ko, niadtong among kabayo, ginabutangan namo og yugo ang iyang liog, sama sa inyong ginabuhat sa baka, aron dili siya makaipsot sa koral. Apan makaikyas gyud gihapon siya, bisag unsaon. Ug isangit niya kanang yugo ug motuyok—tuyok, ug uban pa. Dayon molukso siya sa koral. Ug usa ka adlaw, ang nahitabo kaniya . . .

⁴³ Nagahunahuna gyud ko kung unsa kaha’y nakapadani niadtong among kabayo. Ug aduna diay og halapad nga lungag didto. Karon, nagatindog na siya didto sa mga dagami, oh, mga labong pa gyud, pero ang gusto niya . . . Naa man gu’y mga dahon sa orchard grass didto sa lungag. Ug miambak gyud siya niadtong koral ug misulod niadtong lungag diin atua didto ang tanan niining mga alambre ug bildo, kung asa namo . . . didto mismo namo ginalabay ang—ang among mga basura, ug miadto gyud siya aron makakaon lang og pipila ka mga hungit niadtong orchard grass. Ug kinahanglan pa namong mokuha ug ubang mga kabayo aron birahon siya paggawas niadtong lungag. Niadtong didto na siya, natanggong na gyud siya didto. Ug sa dihang gihaw—as siya didto, nagkurog siya ug nagkadugo, ug—ug ingon niadto ang iyang kahimtang, aron nga makakaon lang og usa, o duha ka hungit niadtong orchard grass, ingon nga nagtindog na gyud unta siya didto sa mga dagami, nga halos taga—tuhod na niya.

44 Kanunay kong gipamalandongan kana nga larawan. “Ang dalan sa usa ka malapason malisud.” Dili gyud siya makontento sa iyang gikahimutangan diin malipayon na unta siya nga nagakaon, pero . . . kinahanglan pa gyud niyang molukso didto sa koral ug mabun-og ug masamdan sama niadto, aron lang nga makakaon og usa ka hungit sa—sa kung unsa nga matang sa sagbot. Karon, ingon niana mismo ang ginabuhat sa mga tawo, nga moikyasa sa koral sa sibsibanan sa Dios. Motoo ba mo niana? Mogawas, mogawas karon; dayon mosulod balik. Anaa na sa sulod sa simbahan, nakatagamtam na gyud unta og mahimayaong panahon; dayon, pagkaugma, ibaylo lang sa ingon-ana nga mga butang. Lisud gayud ang mga ingon niana.

45 Si Ahab halos ingon niana usab nga matang sa tawo. Asa man nga direksyon mohaguros ang hangin, didto pud ginapasibo ni Ahab ang iyang layag, kung *diri* bang direksyon o *diha* bang direksyon. Ang nakahatag kaniya og problema mao ang iyang kaminyoon, sa babaye nga usa ka batan-ong prinsesa, anak nga babaye sa usa ka hari, usa ka Jezebel. Maanyag gyud kung tanawon, matahum kaayo nga babaye, apan dautan siya sa sulod sa iyang kasingkasing. Ug siya usa ka magsisimba sa mga diosdios, ug siya mao’y hinungdan nganong ang tibuok Israel. . .

46 Karon, gusto nakong maghisgot sa makadiyut mahitungod niana, kung unsa gyud kadto, sa pagtuki sa lintunganay bahin sa pagkainahan, kita n’yo, dinha. Ug sa dihang magminyo na ang usa ka lalaki; ang klase sa babaye, ang babaye nga . . . Kinahanglan nga isipon ang labaw pa sa pisikal nga kaanyag. Kinahanglan nga makapangasawa ka, nga mahiusa kamong duha sa kalag ug lawas. usa ka tawo nga mahimo gyud nimo’g higala ug kaabag, nga magpabilin nga matinud-anon kanimo sa kalisud man o sa kahayahay.

47 Karon, pero, si Ahab, siguro, nahigugma lang kang Jezebel tungod kay maanyag siya, ug gipangasawa na siya. Wala na’y laing makita kang Jezebel, tungod kay, dautan gyud siya. Ug miadto siya didto. Ug dayon, siyempre, naibog gyud kaayo si Ahab sa iya, ug nahigugma kaniya, aba, siya ang nagtukmod sa tibuok Israel sa pagpakasala ug sa pagsupak sa Dios, ug giguba ang mga halaran sa Dios; dayon gitukod puli ang mga halaran ni Baalim. Ug nagpahigayon sila og pagsimba kang Baal sa tibuok Israel, niadtong panahona.

48 Karon, ang iyang asawa nahimong hinungdan sa matarung nga si Nabot . . . Daghan kaninyo ang nakabasa na bahin kaniya. Kung giunsa niya pag-ilog sa tanaman ni Naboth, pinaagi sa paglimbong; nanumpa, og bakak, ug giakusahan kini og bakakon nga mga saksi. Tungod kay, gusto niyang pahimut-an iyang bana; ug iyang gipatay ang usa ka matarung nga tawo, aron lang maangkon ang usa ka tanaman nga kasikbit sa yuta sa palasyo.

49 Kadtong tanan, ang Dios diay nagtan-aw. Busa ang propeta, nga si Elias, nga usa ka bantugan, gamhanang alagad sa Ginoo, nagpropesiya ug misulti kang Jezebel kon unsay mahitabo niini. Ug gisultihan niya si Ahab nga pagatilapan sa mga iro ang iya mismong dugo. Karon, sa dihang magsulti ang Dios og bisan unsang butang. . . Siyempre, niadtong mga panahona, ang direktang Pulong sa Ginoo moabot pinaagi sa propeta.

50 “Ang Dios, sa nagkalainlaing mga panahon ug nagkalainlaing mga paagi nagpakig-istorya sa atong mga ginikanan pinaagi sa mga propeta, og sa niining kaulahiing adlaw pinaagi sa Iyang Anak, nga si Cristo Jesus.”

51 Busa, *Kini* mao ang Pulong. Ug kung aduna ma’y bisan unsa nga sukwahi *Niana*, biyai kini. Kita n’yo? Karon, ikaduha, nagapamulong Siya karon pinaagi sa propeta, sa magtatan-aw, ug uban pa. Pero ang una mao *Kini*, ang Pulong. Karon. . .

52 Ug gibuhat ni Ahab niadto ang kadautan. Ug nagpadayon siya sa paghari; og gipanalanginan gihapon sa Dios ang katawhan sulod sa daghang katuigan. Ug, nahitabo nga, si Josaphat ang hari sa Juda, samtang si Ahab pud ang hari sa Israel.

53 Ug, labot pa, usa ka matarung nga tawo si Josaphat. Anak siya ni Asa. Si Asa usa ka—usa ka matarung nga tawo, ug iyang gipanglumpag ang tanang mga halaran sa—sa mga diosdios; og gitukod ang mga halaran ni Jehovah. Ug nagkaaduna sila og usa ka—usa ka rebaybal, kaniadto, didto sa Juda.

54 Ug wala magdugay, si Josaphat, o si Ahab diay, nagpaadto, ug iyang hingkaplagan ang usa ka laing luna sa yuta, didto sa Syria, nga nagtoo siya nga iyaha kadto, nga nagtoo siya nga kinahanglan niyang bawion. Maong iyang gihangyo si Josaphat kung mahimo ba nga mouban siya ug magpakig-abin kaniya.

55 Ug, siyempre, aduna gyu’y dakong kapeligrohan karon, kita n’yo, sa dihang makita nila kining inila nga hari, nga si Ahab, didto, ug dayon makita pud nila ang usa pa ka inila dinhi, nga si Josaphat; ang usa kanila, dagaang; ang usa usab, usa ka tawo nga puno-sa-Espiritu. Pag-amping gyud kung giunsa nimo pagpakig-abin. Bantayi ang imong ginabuhat, kung giunsa nimo pagpasangon og yugo sa imong kaugalingon uban sa mga dili-magtotoo. Pagpabiling limpyo sa imong kaugalingon, ilabi na niining panahona nga atong ginapuy-an.

56 Nagatoo ako, iglesia, sa walay landong sa pagduhaduha, kini nakakulit sa akong kasingkasing. Mao kana ang hinungdan nga akong ginahulat kining lima ka gabii, sa dili madugay; aron sa usa pa ka higayon, sa dili pa kini mahitabo, mahatagan kini nga iglesia og usa ka masuhiron nga pagpanghan-ay, pinaagi sa Biblia.

57 Nagapuyo na kita sa mga landong sa panahon. Mahimo kining mahitabo bisan unsang orasa. Sa dihang atong makita

nga miabot na ang panahon nga ang mga butang nagakahitabo na; ang mismong pagkadautan sa kaaway, ang maong mga gahum. Ngani nasaksihan na nato kining mga bagyong-niyebe ug tanan na nga nagakahitabo, kining tanan nga mga kamatay, tanan nga lainlaing mga butang. Nagakahitabo kana tungod niining mga kagubot, sama sa pagpabuto sa mga bomba ug ingon-anang mga butang. Ilang gigubot ang tanang mga butang. Ug ilang gisamok ang dakung laboratoryo sa Dios, aron matuman ang Iyang Pulong. Mahitabo gyud kini.

⁵⁸ Busa, “ang tawo sa sala” mitungha na, makagagahum, nga malimbongon kaayo. Grabe. Nadungog ko ang usa ka ministro karong buntaga, usa ka tawong puno-sa-Espiritu, nga ginahisgotan ang marka sa mananap ug nag-ingon nga ang anticristo kono mao ang Rusya. Grabe ka sayup. Uh-huh. Wala’y kalabotan ang Rusya niini. Dili, sir. Sumala kana sa Kasulatan. Karon, pero matikdi kining makuyaw nga panahon nga atong ginapuy-an, usa na ka pasidaan kini.

⁵⁹ Karon, kining si Josaphat, medyo mibati og kalipay tungod kay ang gamhanang hari sa Israel miingon, “Umari ka, bisitaha ko.” Ug miadto siya didto. Ug nagdala sila og baka ug karnero, ug uban pa, aron ihalad. Pero tibuok niadtong panahon, sa sulod sa kasingkasing ni Ahab, usa siya ka limbongan, tungod kay wala man gyud siya nagasimba niana . . . o nagahalad nianang mga karnero ug nianang mga butang nga may matinud-anon nga kasingkasing, tungod kay, kung buot hunahunaon, mas nagadapig siya sa relihiyon sa iyang asawa.

⁶⁰ Ug matikdi, sama gayud nga giminyoan ni Ahab si Jezebel niadtong panahon sa dakung mangitngit nga kapanahonan sa Israel, nga iyang gipasulod ngadto sa Israel ang pagsimba sa mga diosdios, usa kadto ka tukmang tipo sa karong panahon. Sama ra niadtong mangitngit nga kapanahonan; nga misunod sa panahon sa unang mga apostoles, ikaduha nga hugna, ikatulo nga hugna, milugway ngadto sa mangitngit nga mga kapanahonan, nga mikabat og kinse ka gatus ka tuig. Sama niadtong nakigminyo si Ahab kang Jezebel ug nagdala og pagsimba sa mga diosdios pasulod ngadto sa Israel, mao usab ang iglesia sa Espiritu Santo nga nakigminyo ngadto sa mga ismo, ug gibalik ang pagsimba sa diosdios, ug karon usa na lang kini ka dagway sa Cristianismo. Kita n’yo? Kita n’yo, mangitngit na kaayo. Ug karon kini nagkaanam og dautan, matag adlaw; ang matag kapanahonan sa iglesia nagapadulong ngadto sa sama ra nga kahimtang, ngadto sa makuyaw nga katapusan, nga mao ang dagaang nga kahimtang nga nagapaingon sa, dagaang nga Laodicea nga Kapanahonan sa Iglesia. Oh, daw sa unsa ka makalilisang nga takna ang atong ginapuy-an.

⁶¹ Paminaw kamo. Gusto kong isugid dinhi mismo, sa dili pa ko mopadayon. Usa ako ka maka-kinaraan nga magwawali nga nangandoy nga masinati pag-usab kadtong karaang mga adlaw.

Kay daghan na kaayo ko'g nakita nga mga pagpakaaron-ingnon niini, nga ginapresentar ang Ebanghelyo sa ingon ka madanihon nga paagi nga iya sa Hollywood, hangtud nga kasukaon na gyud ko ug gikapoy na niini. Oo, sir. Gusto kong makita kadtong kinaraan. Nabalaka ko nga ato nang gihimo nga labing madanihon ang Cristianismo alang sa mga tawo; dilikado na kini nga punto.

⁶² Karon, si Josaphat miadto didto, nga naghunahuna, “Oh, bueno, kining bantugan nga hari sa Israel, akò lang... Oh, kami... Mahimong okey ra kini.” Ug taliwala niining tanang maanyag nga pagdani, unsa ma'y iyang gibuhát? Naghimo siya'g panag-abin, aron moadto ug makiggubat sa kaaway, sa parehong tumong, kay sila miingon, “Kabanay ra kita.” Pero dili gayud. Ang usa puno-sa-Espiritu nga pundok, ang usa mao'y dagaang nga pundok. Dili sila magkaparehong katawhan. Dili, sir. Dili nimo mahimong... .

⁶³ Ang kangitngit dili mahimong makipag-fellowship sa kahayag. Ang—ang gabii dili mahimo nga molungtad sa presensiya sa kahayag sa adlaw. Ug ang labing malimbongon nga panahon, mao ang panahon tali nianang mga panahona. Sa dihang hapit na mosalop o mosubang ang adlaw, mao kana ang labing malimbongon nga takna. Tungod kay walay igong pananaw aron klaro kang makakita; bisan ang mga suga sa imong sakyanan dili moiwag og maayo ug klaro. Mas maayo pa nga ngitngit na lang gyud o hayag. Miingon si Jesus, “Kinahanglan mainit ka o dili usab mabugnaw, dili dagaang.” Siyempre, diha niana ang kapeligrohan.

⁶⁴ Ug dayon si Josaphat, sa dihang miadto siya didto, ug nahitabo kining daku nga panag-abin, nga wala makapahimuot sa Dios. Ug matikdi, niadtong mismong panahona, aduna siya'y kahinam, “Nakabaton ko og pabor niini nga hari. Ug, oh, ako—ako—ako aduna na'y pagpakig-fellowship sa niini nga silingan. Aduna na ko'y... .”

⁶⁵ Kita n'yo, magbantay kamo, niana, iglesia. Kita n'yo? Mao kana ang hinungdan sa tanang kasamok sa niining tabernakulo dinhi, ug bisan sa ubang tabernakulo. Kita n'yo? Magbantay gyud kamo bahin sa kung unsa ang inyong ginauban-ubanan. Kita n'yo? Iklaro mismo, ug dapig ka ba kang Cristo o batok Kaniya. Kita n'yo?

⁶⁶ Karon, kining tawhana naghimo'g panag-abin, ug siya nagdahum nga siya nakahimo'g usa ka mahinungdanong butang. Bisán pa niana, niadtong miingon siya'g, “Dili ba angay lang nga, sa dili pa kita motungas, kinahanglan mokonsulta sà ta sa Ginoo mahitungod niini?” Karon, si Josaphat aduna pa'y igong pagka-relihiyoso nga nahibilin diha kaniya, bisan pa sa iyang kasaypanan, nga siya miadto didto niini nga hari, pero aduna gihapon siya'y igong pagka-relihiyoso nga nahibilin

kaniya nga nakahunahuna pa siya'g, "Buena, kinahanglan mokonsulta man lang usà kita sa Ginoo."

⁶⁷ Karon, si Ahab nagapadayon lang gyud nga walay bisan unsang pagpakisayod; nagasalig na lang sa iyang kaugalingong mekanikal, pisikal, nga tawhanong paagi sa pagbuhat sa mga butang.

⁶⁸ Nahunahuna lang nako karon, iglesia, kung dili ba kana atong dugay na, makadaghan nang mga higayon, nga sa ingon niana usab kita nakahimo'g sayup. Panguhaon kining sulbaron, ug moingon, "Buena, angay gyud nga ingon *niini* kini," ug ipahiluna natong ingon niana.

⁶⁹ Sa tan-aw ko ingon niana ang kadaghanan sa ebanghelismong Amerikano karong panahona, nga gibutang nato kini sa usa ka porma sa—sa, tawgon ko kini'g, ebanghelismong Hollywood, nga puro na lang og pagpangdani. Namatikdan nato nga pag-nagasaka na ang ebanghelista sa entablado, sa karong panahon, ug, grabe, taas gyud kaayo ang tan-aw niya sa iyang kaugalingon, ug daghang mga komedya ang ginasulti sa dili pa siya magsugod og wali, ug mga butang nga sama niana, ug unsa na lang ipangsulti ug manglihok nga sama sa usa ka payaso, diha sa pulpito. Pag-abot sa takna nga magpahigayon na og pagtawag sa altar, ang mga tawo wala man lang makita og unsa man nga pagka-sinsero aron ipahigayon ang maong pagtawag sa altar. Husto kana. Mao kana ang hinungdan kung nganong midangat ang kalibutan sa dagaang nga kahimtang karon, nga gikahimutangan na niini.

⁷⁰ Nahunahuna ko, karong panahona. Mora'g, karong panahona, ako... Ang iglesia, naningkamot gyud kita nga mapaeskuwela ang atong mga anak nga lalaki, aron makakat-on og sikolohiya, ug uban pang susama niana, aron mahibalo kung unsaon pagpahigayon og usa ka programa, unsaon pagsaka sa pulpito ug sa unsang paagi nga mahan-ay ang atong... Nga ang mensahe kinahanglan makadani gayud, nga makakabig gyud og mga tawo, ug makuha ang ilang atensyon. Ug daghang batid nga mga sikolohista ang nahimong magtutudlo nga ingon niana, ug gina-drama ug ginadugangan og butang aron mas mahimong madanihon pa. Ug napahunahuna na lang ko, sa dihang ilang... nga... Kanunay natong ginahisgotan ang katahum ug ang kaanindot sa simbahan. Pero napakyas kita sa pagsulti kanila, "Ang mosunod Kanako, magdumili siya sa iyang kaugalingon, magpas-an sa iyang krus, ug mosunod Kanako." Nahunahuna ko kung dili pa ba nato gihimo ang atong simbahan nga labi pang matahum, aron lang nga mosulod ang tawo.

⁷¹ Pananglitan, adunay usa ka slogan karon ang iglesiang Baptist, "Usa ka milyon pa sa '44," nagapangdawat og linibo ka mga miyembro, ug mga napulo ka linibo, nga wala pa makabig,

mga tawo nga igo lang mosulod og magpamiyembro sa iglesia. Ug usa kini ka kaulawan sa Iglesia ni Jesus Cristo, ang pagdawat og ingon niana nga matang sa mga miyembro. Nga naga-inominom gihapon. Nga nagapanigarilyo gihapon. Nga nagasugal gihapon. Nga nagapamakak gihapon.

⁷² Nagatambong sila sa simbahan, nga nagadahum nga malingaw sa niadtong pundok sa Hollywood nga mga ebanghelista nga nagawali, nagahimo'g daghang pangdani, ug ginapasundayag ang dagkung mga instrumento diha sa taas-ug-ubos sa entablado.

⁷³ Sa dihang, ang angay unta nilang ipahigayon mao kanang kinaraan, una-ang-Dios, nagatuaw, nga pagtawag sa altar didto; diin ang mga kalalakin-an ug kababayen-an wala nagatambong alang sa maong mga pagpasundayag, o nagaadto didto ug nagapanggawi nga mora'g payaso, kondili para moluhod didto sa altar ug pamalandongon ang kamatayon ni Jesus Cristo, nga namatay alang kanila, nga sila nagabalik nga matitud-anon ngadto sa Dios pag-usab.

⁷⁴ Nahunahuna ko kung dili kaha nagpuyo na kita sa nianang matang sa panahon, sa dihang nagadawat kita'g mga bantugang ebanghelista, sama nianang mga nagalibotlibot sa kayutaan karon, mga inila nga mga ebanghelista nga nagtuon og sikolohiya ug nagadani og mga tawo sa simbahan. Apan human nimo sila mapasulod sa simbahan, unsa na ma'y imong buhaton kanila pagkahuman? Unsa—unsa ma'y mahitabo pagkahuman nga nakasulod na sila sa simbahan? Igo lang magpamiyembro sa simbahan, ug dayon manguli nga dala ang mao ra nga sala ug ang mao rang kailibgon nga anaa kanila niadtong misulod sila sa simbahan. Manguli sila nga mao ra sa gihapon. Ug mao kana ang hinungdan, karon, nga napanid-an sa kalibutan, nga moingon, “Bueno, kung *kanang* lalakiha adunay relihiyon, kung *kining* tawhana adunay relihiyon . . .”

⁷⁵ Nabalaka ko nga nahimo nato kini nga ingon niana na lang ka sayon. Kini, gusto ko . . . Sa hunahuna ko, ang kalipay, sigurado, nagtoo ko nga ang tanang kalipay anaa kang Jesus Cristo. Husto kana. Nagatoo ko nga puno kini og kasadya ug kalipay. Pero hinumdumi, igsoon, dalan pud kini sa kasakit ug pag-antus ug dalan sa krus. Kinahanglan ninyo kanang maamgo, usab. Husto kana. Nahunahuna ko kung dili kaha nato kini napintalan og sobra—sobra ra ka malapnoy.

⁷⁶ Sama ra, nga pagtan-aw ko, ug gibutangan diay sa akong asawa . . . Andam na unta ko mogawas, niadtong iyang gibutangan og usa ka rosas ang akong amerikana karong buntag. Ingon niya, “Kinahanglan nga isul-ob mo kini. Buhi pa ang imong inahan.”

Ug miingon ko, “Oh, langga, ambot lang kaha.”

⁷⁷ Maanindot ang Adlaw sa mga Inahan, apan daw sama na kana sa kalibutan, gihimo na nilang negosyo kini, para lang makabaligya og mga bulak ug mga butang nga ingon niana. Aba, pagpakaulaw kana sa mga inahan. Aba, ang akong inahan mao gyud ang akong inahan kada adlaw sa tuig, oo, sir, dili lang sa usa ka adlaw.

Moingon ko, “Gihigugma ba ninyo ang inyong inahan?”

⁷⁸ “Gipadalhan ko siya og usa ka pungpong sa mga bulak niadtong Adlaw sa mga Inahan.” Bueno, igsoon, angay siyang hataga’g bili isip usa ka inahan matag adlaw. Pero nahimo na kining negosyo.

⁷⁹ Maanindot man kanang bulak. Ganahan gyud ko’g maanindot nga bulak. Mao kana’y akong gihunahuna sama gyud nga akong. . . Kung unsa gyud kamaanindot sa maong bulak. Nagapamulak kini. Ug aduna kini’y kahumot. Ug masimhotan kini sa mga-nagaagi. Bisan ang mananap nga moagi, makasimhot gyud niini. Pero, karon tan-awa n’yo, matahum kini. Sama sa Iglesia ni Ginoong Jesus Cristo, Kini ang pinakamahimayaon nga butang; mga Balaanong pagpang-ayo, ug mga gahum, ug mga katingalahan, ug mga ilhanan, ug mga milagro, ug kagawasan gikan sa sala. Matahum kini nga dapit. Pero, tan-awa n’yo, kung kana nga rosas. . . Kita kinahanglan nga motubo, ang Iglesia, sama sa tanang kinaiyahan.

⁸⁰ Kana nga rosas, tungod sa pagkatahum niini, pagatilapan kini sa matag baka sa umahan kung makahigayon. Apan ang kinaiyahan naghatag og gagmay nga mga bayoneta, mga gamay’ng bangkaw nga migim-aw dinha, nga gitawag og mga tunok, ug maong dili nila kini mahilabtan. Mao kana ang nanalipod niini. Sakto gayud.

⁸¹ Ug sa tan-aw ko, karon, kung wala ta nagbaton sa Pulong sa Dios, nga labi pang mahait sa espada nga duhay sulab, nga nagapalibot sa katahum sa gahum sa pagkabalaan sa Dios, ato gyu’y mapasagdan ang matag baka sa umahan nga motilap Niini ug hugawan Kini. Pagabuling-bulingan niini Kini. Mamahimo kining kaulawan sa Iglesia. Husto kana.

⁸² Sa hunahuna ko, karon, ang atong gikinahanglan mao ang maka-kinaraan, tinawag-sa-Dios nga mga ministro, maisogon, tingali dili kaayo edukado, apan pagadad-on ang mga tawo ngadto sa altar, ug didto magatuaw sila. Dili nga nagalipay-lipay ug nagkinataw-anay, ug nagapaburot og chewing gum, ug ginapalista ang ilang ngalan sa papel; apan, igsoon, usa ka pagdanguyngoy ug pagtugyan sa kaugalingon, hangtud nga ang mga kalalakin-an ug mga kababayen-an hingpit nga maghinulsol sa ilang mga sala ug magaduol sa Dios. Amen.

⁸³ Sultihan ko kamo, aduna kita’y, “Ipataas ang inyong mga kamot, kamo nga gustong modawat kang Cristo,” tanan nang

ingon niana. Okey man kana, igsoon, apan dili kana—dili kana makapatangtang sa sala.

⁸⁴ Kinahanglan nga maghinulsol ka usà, magpatul-id, magluhod didto ug magatuaw. Mahinumduman ko pa ang mga panahon sa dihang ang mga maka-kinaraan nga mga tawo molakaw diha sa tibuok pasilyo, ug ngadto-nganhi sa kadalanan, nagahilak, ug nakig-estorya sa ilang mga silingan. Ingon-ana ang mga Cristohanon kaniadto; ginasultihan ang mga tawo mahitungod sa mga butang nga iya sa Ginoo.

⁸⁵ Ug, sa karon, igo lang nga ipalista nato ang atong ngalan sa libro sa simbahan, ug dayon mouli ug magpabilin lang sa balay, ug dili gyud magpamatuod og bisan usa ka pulong mahitungod Niini. Walay pagpakabana. “Basta kay miyembro ta sa usa ka iglesia, okey na kana.” Sigurado ko nga nasayup kita dinha, mga igsoon. Magsusi kamo. Tungod kay, dili kana makabarug pag-didto na sa mga paghukom. Dili, sir. Dili gayud.

⁸⁶ Dili kini kinahanglan mokulang sa, “Ang mosunod Kanako, magdumili siya sa iyang kaugalingon, magpas-an sa iyang krus, ug mamatay adlaw-adlaw.” Magpabiling patay, didto sa krus. Husto gyud. Aduna gyu’y pag-antus! “Ang dalan, pagapilion ko ang dalan,” inyo kining ginaawit, “kauban sa tinamay nga gamay’ng panon sa Ginoo.”

⁸⁷ Sa hunahuna ko karong panahona, grabe na gyud kaayo kining panahon nga atong ginapuy-an! Nga, bisan ang ebanghelismo, ginamantala gyud nila kini sa dagkung dunay suga nga mga karatula, ug ginapaninguhaan nilang. . . . Pagmakita mo nga adunay moabot nga ebanghelista sa siyudad, mapahunahuna gyud ka. Ako, ingon niana na pud kaha ka sad-an ang akong mga panagtigum. Ingon niana na kaha. Nahunahuna ko usahay, kung kinsa ba gyud ang moabot sa siyudad, ang ebanghelista ba o si Jesus Cristo? Aba, aduna sila’y. . . .

⁸⁸ Nakaadto ko’g usa ka lugar dinhi, dili pa lang dugay, diin aduna kono’y moabot nga usa ka ebanghelista. Ug ang Jesus’ Name. . . . Aba, aduna sila’y retrato sa ebanghelista, “ang tawo sa maong takna,” ug ang tawo nga aduna *nini*, ug ang tawo nga aduna pud *niana*.

⁸⁹ Ako, ginapamalandongan nako usahay ang akong ministerio, ug makita nako ang mga tawo nga nanambong. Ug mosulod ko didto sa lawak sa hotel, moingon, “Dios, kinsa—kinsa kaha ang gianhi sa mga tawo aron makita, ako ba o Ikaw?” Kita n’yo? “Kung mianhi sila aron ako ang makita, nan sila nahisalaag, diay; pero, Oh Dios, ipaubos ako, ipadaplin ako. Buot kong magrepresentar Kanimo, ang Usa Nga among atubangon sa umalabot nga adlaw, nga nagakurog ang mga kamot ug nagkurog-kurog, ang maluya nga lawas, nga nagatan-

aw Kanimo. Sa pagkahibalo nga ang akong kalag nagdepende sa Imong paghukom.” Ituboy nato si Cristo.

⁹⁰ Karon, moingon ka, “Bueno, miyembro man ko sa Baptist. Usa ako ka Methodist. Sakup ako sa tabernakulo. Gibuhat ko *kini*.” Oh, wala kana’y kalambigitan niini; wala gayud. Nahunahuna ko gani usahay.

⁹¹ Dinhi dili pa lang dugay, nakakita ko’g usa—usa ka pahibalo, diin usa kono ka partikular nga buluhaton ang igapahigayon sa siyudad. Ug ang pulong sa maong tawo, ang ngalan sa maong lalaki nakasulat tanan sa dagkung mga letra, nga sama *niana*. Ug sa ubos niini, sa gamay’ng kantong bahin, nakasulat, “Si Jesus Cristo mao sa gihapon kagahapon, karon, ug hangtud sa kahangturan,” didto sa ubos kaayo nga kantong bahin. Kita n’yo?

⁹² Ila nang gikuha ang tanang kasagrado kang Cristo, ug gibutang kini ngadto sa usa ka tawo, o usa ka iglesia, o usa ka organisasyon. Igsoon, sultihan ko kamo, mahimong aduna ka’y kagarbohan, pang-Hollywood nga pagpasundayag, nga sama niana, sulod sa . . . sa iglesia. Pero, sa Presensiya ni Jesus Cristo, Siya mao lamang ang Usa nga angay himayaon. Husto kana. Karon, mao kana ang kamatuoran, minahal kong igsoong lalaki ug igsoong babaye.

⁹³ Ayaw mo kasuko nako. Hinumdumi nga nagawali lang ako kaninyo. Gusto kong magwali ingon nga daw sa mao na kini ang katapusang wali nga akong mawali sa tibuok kong kinabuhi. Gusto kong iwali, ang matag sermon nga akong igawali, nga daw ako usa ka himalatyon na nga tawo nga nagawali ngadto sa naghimalatyon na nga mga tawo. Ug, ingon-ana ako; ang akong kahayag hinayhinay nang nagakapalong, sa matag adlaw; og sa inyo man, usab. Ug kita’y mangamatay nga mga mortal. Ug kinahanglan natong atubangon ang buhi nga Dios, usa niining mga adlawa, ug kinahanglan halawum atong pagkasinsero bahin niini.

⁹⁴ Dili igo ang pagpangdani lang, ug kung unsa na lang, ug pagpamiyembro sa iglesia, ug pagtambong *dinhi* ug *didto*, pagpanggawi og ingon *niini* ug ingon *niana*.

⁹⁵ Kinahanglan nato ang kinaang panagtigum sa pagpang-ampo sulod sa atong mga panimalay, ug pagtuaw ngadto sa Dios, adlaw ug gabii. Haduol na ang adlaw, “ang panahon sa kasakitan, ang panahon sa kasamok.” Ang Biblia nag-ingon, “usa ka mangitngit nga adlaw.” Ug kita nagpuyo na niini.

⁹⁶ Milugsong gayud didto kining halangdon nga tawo tungod sa kahinam. Nakig-abin siya uban sa mga dagaang, uban sa mga alang-alang, ug nagdahum nga nakabuhat siya’g usa ka mahinungdanon nga butang, abi niya nga ginapanalanginan siya sa Dios. Ug wala niya naamgo niadtong higayona nga gidala na niya kadtong tibuok pundok niya uban kaniya. Unsa? “Ang

gamay namong grupo dinhi, sa—sa Juda, moanha ug ipakig-abin ang among kaugalingon uban sa dakung pundok sa Israel. Mahimo gayud kitang gamhanan nga mga katawhan.”

⁹⁷ Tan-awa. Ug mao kana ang mismo linya sa pagpanglimbong nga gigamit karon sa yawa, aron ipasulod ang anticristo; sama ka sigurado kung giunsa ko kini gibarugan. “Atong ihiusa ang atong mga pagpaningkamot.” Dili nato mahimo kana. Magkuyog ba ang duha ka tawo, gawas kon sila magakauyon?

⁹⁸ Kining Estados Unidos nakabuhat pud og ingon-ana, ingon-ana pud nga kasinatian ug ingon-ana pud nga sayup, sa dihang nakighiusa kini sa Rusya kaniadto. Mao kadtong panahon nga andam na sila sa pagpakiggubat, ug nakig-abin kita sa Rusya. Ug karon nakita n’yo ba kung unsa’y atong nadangtan, dili ba? Naangkon hinoon nila ang atong mga eroplano ug ang tanan natong mga sekreto, ug ang atong mga bomba atomika ug ang tanan atua na didto, aron ibomba batok kanato. Ingon niana usab ang nagakahitabo sa espirituwal.

⁹⁹ Dayon atong nahibaloan, human nga nakig-abin si Josaphat, ug niadtong nagkonsulta sila. Karon tan-awa n’yo, tan-awa n’yo ang kalibutan sa gawas, ingon niya, “Sige, daghan man mi’g mga propeta dinhi. Aduna kami og seminaryo nga puno nila.”

¹⁰⁰ Miadto sila ug gikuha kadtong mga nabansay nga mga kalalakin-an, nga mga may kahibalo sa sikolohiya, nga hanas sa tanang mahitungod niini. Miingon, “Umari kamo karon, ug mangutana mi ug mokonsulta sa Ginoo.”

¹⁰¹ Silang tanan, siyempre, sa ilang unodnong mapasigarbohon nga panghunahuna, miadto didto ug miingon, “Karon, tan-awa, kami . . . Sige adto mo. Ang Ginoo magauban kaninyo, ug igahatag sa Ginoo kanang luna sa yuta didto, nga, mamainyo kini. Mapapahawa ninyo ang mga Sirianhon. Mahimo gyud ninyo kini.” Ang usa kanila naghimo pa gani og daku nga parisian sa sungay nga puthaw alang kaniya, ug nagdagan-dagan nga sama *niini*, nga nagaingon, “Pinaagi niini, inyong mapapahawa ang mga Sirianhon.”

¹⁰² Pero, si Josaphat, ingon nga mas espirituhanon, dili niya madawat kanang walay hinungdan nga panggawi nga mora’g payaso. Husto gyud.

¹⁰³ Dios, hatagi kami og dugang pa nga mga Josaphat, kasukaon ug gikapoy na kami niining Hollywood nga pinayaso. Husto kana, nagpaaron-aron, nagpakaaron-ingnon nga ingon niini-ug-ingon niana pero dili diay; nagapasundayag, nagadramadrama, aron mangdani. Ug dayon pagnakasulod na sila, unsa ma’y aduna ka pagnakasulod na? Sama ra nga gihagad mo ang usa ka tawo nga “manglangoy ta dinhi sa disyerto”. Wala ka’y makuha gawas sa balas ibabaw sa imong ulo, nga mahimong hinungdan sa kasubo inigkahuman.

¹⁰⁴ Karon matikdi n'yo, asa mo man diay sila mahimong dalahon? Dunay usa ka babaye ang miingon kanako niadtong miaging adlaw, "Usa ka lalaki ang nagsulti, 'Mosimba ko, apan unsa—unsa ma'y akong makuha kung mosimba ko?' Miingon, 'Pag-organisar ra og panihapon ang ilang ginabuhar, ug sila . . . nanaghisgot mahitungod *niini*, *niana*, ug ang *uban pa*.'" Ug miingon ang babaye, "Wala gyud ko nakatingog, kay wala ko kabalo kung asa ko siya pasimbahon." Tan-awa n'yo. Miingon, "Unta makakaplag ko'g usa ka karaang iglesia kon diin ginakanta gyud nila ang kinaraang mga himno ug nagakinabuhing diosnon."

¹⁰⁵ Gutom na gyud ang mga bata, mokaon na lang sila bisan sa basurahan. Anaa na kini sa Iglesia sa buhing Dios ang pagpakaon kanila sa tinuod nga buhing Pulong sa . . . sa Dios.

¹⁰⁶ Didto, taliwala sa tanan niadtong mga magarbong butang ug mga ingon-ana, miingon si Josaphat, "Wala na ba'y usa pa?"

¹⁰⁷ "Usa pa?" ingon ni Ahab. "Bueno, unsa pa ma'y gikinahanglan mo sa usa pa? Aduna mi'y upat ka gatus nga pinakamaayo, pinili, edukado, mga gipakaon-og-maayo, -posturado nga mga kalalakin-an nga aduna sa nasud, nga ania karon. Ang matag usa kanila nagkahiusa, ug nagkahiusa ang kasingkasing, ug nagkahiusa ang tingog, nga nagaingon, 'Adto mo! Ang Dios nagauban man kaninyo.'"

¹⁰⁸ Nahunahuna ko kung ang Estados Unidos dili kaha midangat na niana. Nahunahuna ko kung dili kaha midangat na ngadto sa samang butang ang Iglesia sa Dios. Nahunahuna ko kini. "Bueno," moingon, "tan-awa n'yo, nagmalampuson man lagi sila. Nagapahigayon sila'g halapad, dinagkung mga panagtigum. Linibo ang makabig nila sa usa ra ka higayon." Pero sa hunahuna ko wala na ba kaha'y usa pa. Wala na ba kaha'y usa pa nga mas lahi.

¹⁰⁹ Nasayran na nato, nga aduna kita'y traynta ka libo nga mga kinabig sulod sa unom ra ka semana, dayon unom ka semana human niana wala na'y nahibilin bisa'g isa. Aduna gyu'y sayup sa kung asa man. Husto kana. Puro lang diay pagpasigarbo, pagpakaaron-ingnon. Ang kalibutan, pinaagi sa telebisyon, pinaagi sa radyo, pinaagi sa mga salida, ug pinaagi nianang mga pagsibya, gidaut kining nasura sa mga binuang sa Hollywood. Husto kana. Ang tanan nagatinguha na nianang dakung kagarbohan. Dili ba kamatuoran kana? Nasayod kamo nga kana ang kamatuoran. Wala na ta niadtong kinaraan nga relihiyon nga aduna kita daghan nang mga tuig ang milabay. Tungod kay gipasagdan ra nato kini nga mokunhod. Modangat ra ta niana, taudtaud, inyong makita.

¹¹⁰ Aba, pagkamatahum nga hulagway, o makapatandog gayud nga hulagway, diay. Ug ania si Josaphat, nga miingon, "Oo, nakita ko silang tanan. Sila, matag usa kanila, adunay ilang mga

digri,” ug unsa man kadto. “Tanan sila gihimong mga propeta, o tinahod nga mga ministro. Ninggraduwar sila sa bantugang mga kolehiyo. Ug mga ingon niana silang tanan. Naggikan gyud sila sa inilang eskwelahan sa mga propeta, ug tanan na. Nanagsabot sila sa pag-usa sa usa ka kabubut-on. Tinuod kana. Apan aduna ba’y usa pa?”

111 “Bueno, unsa pa ma’y imong gikinahanglan sa usa pa, nga naghatag na man og pagtugot ang tanan niining upat ka gatus?”

112 Apan kadtong tawhana, sa kinahiladman sa iyang kasingkasing, adunay Dios. Ug nasayod siya nga aduna gyu’y sayup mahitungod niana. Oo, sir. Nasayod siya nga aduna gyu’y dili maayo didto. Ngano man? Hatagan ta mo’g. . . Ang Kasulatan wala magkutlo niini, apan ania ang akong nasabtan. Kabalo ko nga—nga si Josaphat nasayod nga kadtong hipokrito didto, si Ahab, dili matarung atubangan sa Dios. Ug gipropesiya na ni Elias ang Pulong sa Dios ngadto kaniya. Ug busa unsaon man pagpanalangin sa Dios sa Iyang gitunglo na? Amen.

113 Ginasulti ko ang mao rang butang karon, higala. Ug ang Iglesia sa buhi nga Dios, nga nagabarog nga matinud-anon sa Dios, magasulti usab sa mao rang butang. Dili nimo mahimong isagol ang lana ug tubig ug tawgon kini nga kaluwasan. Dili mo mahimo. Kinahanglan nga ihimulag mo ang imong kaugalingon, igsoon. Aduna gyu’y usa ka butang nga kinahanglan mahitabo. Kung aduna pa’y nahabilin nga paglaum, kinahanglan nga aduna kita’y buhaton, ug buhaton dayon nato kini; kay, haduol na ang takna sa Pagsakgaw.

114 Nagatipun-og na ang mga butang, ang tanan-tanan, ug ang iglesia nahisalaag na kaayo. Ginabasa nila ang tanang matang sa mga magasin, mga basahon, mga sugilanon, ug tanan na. Puede ko moadto karon sa usa ka . . . Puede ko moadto sa usa ka simbahan, ug moingon ko, “Oh, pila ang nahibalo. . .” Nahibalo sila sa matag himno, human niadtong usa sa mga dagkung rebaybal. “Karon, unsa—unsang panid ang ingon niini-ug-ingon niana nga himno?” Nahibalo gyud sila. Nahibalo sila kung kinsa kadto. Nahibalo sila kung kinsa ang modagan sa pagka-Presidente, ug kinsa ang modagan alang *niini*, ug pila ka mga artista sa pelikula ang naminyo na, nahibalo sila *niini* ug *niana*, ug *uban* pa. Pero, mahitungod sa Pulong sa Dios, wala gyud sila’y nahibaloan. Tan-awa ra. Busa atong ginahatag kanila puro kaan-. . . Ug, bisan pa niana, sila nagaangkon nga mga Cristohanon.

115 Ug dili ang mga tawo ang angay basolon. Kay gikan man kini nianang luyo sa entablado, diin kini naggikan. Sakto gyud. Naggikan kini nianang anaa luyo sa entablado. Ilang ginatudloan sila sa tanang matang sa mga ritmo, ug tanan nang matang *niini* ug *niana*, ug mga organisasyon, ug unsaon pag-organisar og mga grupo sa kabatan-onan, ug tanan na nga ingon

niana. Nahunahuna ko kung gibayran ba kaha kini. Wala man ko'y batok niini, pero mao ba kaha kana ang gikinahanglan sa Dios.

¹¹⁶ Sa dihang, miingon si Jesus, "Gawas kon ang usa ka tawo matawo diha sa tubig ug sa Espiritu, dili gayud siya makasulod sa Gingharian. Siya nga mo-. . .ang buot mosunod Kanako, magdumili siya sa iyang kaugalingon, ug sa iyang kaugalingong kalibutanon nga mga kalipayan, magpas-an sa iyang krus, ug mosunod Kanako." Ang *Krus* usa ka simbolo sa "kamatayon, paghingutas." "Siya nga magpaka-Cristohanon, kinahanglan hukasan niya ang iyang kaugalingon og kaugalingon niyang mga hunahuna. Kinahanglan hukasan niya ang iyang kaugalingon og kaugalingon niyang mga buhat. Kinahanglan hukasan niya ang iyang kaugalingon og tanantanan, magdumili sa iyang kaugalingon, ug pas-anon kanang balaan nga krus, ug mosunod Kanako adlaw-adlaw. Siya nga buot mosunod Kanako, ipabuhat kaniya kana." Mao kana ang giingon ni Jesus.

¹¹⁷ Apan, sa karong panahon, moingon na lang ta'g, "Magmalipayon ang tanan. Ang tanan ipalakup ilang mga kamot. Ang tanan magsinggit og, 'Alleluyah!' Ang tanan buhaton *kini*." Oh, pagkadaghan ba nato'g kuskus-balungos! Amen. Dios. . .Aduna pa'y mga bag-o natong alawiton ug ginakanta nato kini sa hilabihan kapasas, nga mora'g makalusot na ta sa bungbong sa kapasas, o mora'g ingon niana.

¹¹⁸ Unta, para sa ako, kung ato lang awiton kining *Nearer, My God, To Thee*, mas maayo gyud unta alang sa Iglesia; ang pang-kinaraan nga mga himno.

¹¹⁹ Mokuha sila'g mga tawo nga manugtogay sa sayawan, kung kinsang batan-ong lalaki nga manugtogay sa sayawan nga nagtugtug didto, kagabii, ug dayon karong gabhiona siya ang magatugtug dinhi sa iglesia sa buhi nga Dios? Dulumtanan kini sa panan-aw sa Dios. Kinahanglan masulayan kanang tawhana, unà, ug ipabunga usà siya og bunga, nga mahiangay sa paghinulsol, aron ipakita nga siya matarung sa atubangan sa Dios.

¹²⁰ Ila nang ginadala ang kalibutan sa jazz diha mismo sa entablado. Ila nang ginadala ang Hollywood, magarbohon nga pagwali, diha mismo sa entablado.

¹²¹ Aba, dili ba didto man ako sa inyong matahum nga siyudad, pipila ka semana ang milabay, sa Louisville, Kentucky? Nahugno gyud ang akong kasingkasing, sa dihang nanaglingkod silang tanan didto, naghinam-hinam nga makakita og mga milagro sa Dios; ug sa dihang nagsugod ka na'g wali sa Maayong Balita, gipuno unta nila ang luna, apan sa kalit lang, mitalikod ug migawas sila sa bilding. Sigurado. Ayaw nila Niini. Nanggahi na ang ilang mga kasingkasing. Nanggawas; ug

daghan kanila, mga Protestante, pa gyud, nga nagatambong sa mga Protestanteng simbahan. Apan napuno na sila . . . napuno na kaayo sa magarbohong butang ug tanan nang ingon niana, mga binuang ug iglesianismo, hangtud nga wala na sila'y nahibaloan mahitungod sa Espiritu sa buhi nga Dios. "Nga nagabaton og dagway sa pagkadiosnon, ug nagapanghimakak sa Gahum niini."

Grabe nga adlaw ang atong ginapuy-an. Bantayi kini kung asa kini mosangpot.

¹²² Ingon ni Josaphat, "Kabalo ko, Ahab. Nga ania ang imong upat ka gatus nga mga magwawali. Tanan sila desenteng-tanawon nga mga kalalakin-an, ang matag usa kanila nakapostura ug hapsay gyud ang ilang buhok, ug tanan na, kung unsa pa man sila. Mahimong adunay ilang mga D.D.'s. Mahimong aduna sila og tanan nang matang sa mga digri. Mahimong nahibalo sila sa mga Kasulatan, gikan sa A hangtud sa Z. Apan wala na ba ka'y usa pa, sa kung asa man nga dapit? Wala na ba'y usa pa, sa kung asa man?"

¹²³ Ingon niya, "Oo, aduna pa'y usa, pero nagadumot ako kaniya." Tan-awa ra. Tan-awa ra. "Nagadumot ako kaniya." Hinumdumi n'yo, si Ahab usa ka relihiyoso nga tawo, ug mga relihiyosong magtutudlo kadtong mga tawo didto, pero gidumtan nila kining lalaki nga dala mismo ang Kamatuoran. Miingon, "Nagadumot ako kaniya." Miingon, "Kanunay na lang siyang nagasinggit og mga butang nga batok kanako." Unsaon man diay pagpugong ni Micheas sa pagbuhat niadto, nga mismong Pulong sa Dios man ang nagkondena kang Ahab?

¹²⁴ Unsaon man nimo pagpakahilum kung ikaw usa ka lalaking alagad sa Dios, o usa ka babaye nga alagad sa Dios, ug nasayod ug nakita mismo ang sala ug ingon-anang mga butang, nga nagkatipun-og ug nagkaanam og kabug-at, ug tanan nang ingon niana; ug nakita ang mga kalag sa tawo nga padulong na sa impiyerno; nga minilyon kada adlaw; ug maghilum lang? Dili mo kana mabuhat.

Dunay nag-ingon sa ako niadtong miaging adlaw, miingon, "Sa tan-aw mo mapugngan kaha nimo kini?"

¹²⁵ Ingon ko, "Dili. Dili ko kana mapugngan, tungod kay gisulti na sa Dios. Apan moabot ra ang adlaw, didto sa Korte sa Paghukom, ilang ipagawas kanang daku nga tabil, paandaron kanang kamera didto, ug ipatukar kanang teyp rekorder. Ug motindog ko ug magapaminaw niini; gusto kong madungog ang akong tingog nga nagpasidaan batok niini. Ang Dios mao'y akong maghuhukom sa dihang madungog na ang akong tingog nga nagasulti batok niini." Oo, sir. Sa diha nga makita na nato kini nga kinabuhi, kining henerasyon, nga igapahayag didto pag-usab sa hukmanan. Sigurado kana. Nagapuyo kita karon sa usa ka makalilisang nga panahon. Ug mao na gyud kini.

Ug makita nato nga buhaton niya . . . miingon siya, “Wala na ba’y usa pa?”

¹²⁶ Ingon niya, “Oo, pero nagadumot ako kaniya, kay kanunay siyang nagapropesiya og dautan batok kanako.”

¹²⁷ Unsaon man niya pagpugong sa pagwali niadtong mabug-at nga mga butang, sa dihang nakita man niya kini nga nagakahitabo? Nga nakita niya si Ahab nga ingon niadto ang pagkinabuhi ug ingon niadto ang ginabuhat, ug ginadala ang mga tawo nga mamaingon niadto.

¹²⁸ Unsaon man sa usa ka lalaking alagad sa Dios, o usa ka babayeng alagad sa Dios, nga pugngan ang pagsinggit ug ang pagbadlong sa sala sa tanang dapit? Sa dihang, ilang nakita kining dagaang nga mga magwawali, ug mga magarbohon, ug mga magtutudlo, ug uban pa nga sama niana, nga ginapasagdan ang mga tawo nga mahiadto sa impiyerno, minilyon ang gidaghanon, tungod sa pagpanglimbong; daghan . . . bisan niadtong mga tawong holiness. Wala ko maghisgot mahitungod sa mga Methodist ug Baptist, ug mga butang nga sama niana; apan aduna pud sila’y ingon niini, usab. Pero anaa ra kini sa inyong kaugalingong mga pundok.

¹²⁹ Grabe, moanha sa entablado, nga mora og tanan nang uban pa gawas sa pagka-Cristohanon, nagakinabuhi nga sama sa uban, sa tibuok nasud ug ingon-anang mga butang, dayon ginatawag nila kini’g “relihiyon.” Tuod man nga usa kini ka relihiyon, pero halayo ra gyud sa kaluwasan sa Ginoo. Husto kana. Ginabuyo lang nila ang mga tawo aron mamahimong dakung pundok sa mga tawong emosyonal. Dayon sa dihang nawala na ang pagka-emosyonal, human niana, masayran mo na lang, nga wala na ka’y makita bisan usa kanila; wala na’y sulod ang simbahan. Igsoon, kung ang usa ka tawo nahigugma sa Dios, nakalingkod gyud siya sa iyang lingkoran sulod sa simbahan, sa tanang higayon. Dili niya mahimong mopalayo niini. Husto kana.

¹³⁰ Karon matikdi n’yo, pipila na lang ka minuto. Paningkamutan kong magdali, modiretso na ko sa punto karon, kay nagakahurot na ang akong oras.

Matikdi n’yo, dayon miingon siya, “Wala na ba’y usa pa?”

¹³¹ Miingon siya, “Duna pa, pero nagadumot ako kaniya. Kanunay siyang nagapropesiya batok kanako. Nagasulti siya’g dautang mga butang batok kanako.”

“Sige,” miingon, “ipakuha siya.”

Miingon siya, “Micheas ang iyang ngalan.”

¹³² Apan kini nga tawo adunay igong relihiyon aron mahibaloan nga dili gayud husto kining mga tawhana.

¹³³ Ug ang si kinsa man nga tawo nga natandog, bisan gamay, sa Espiritu sa Dios, nahibalo nga kining mga butang, nga gitawag

og Cristianismo sa karon, dili gayud husto. “Dili nimo mahimong higugmaon ang kalibutan, o ang mga butang sa kalibutan. Kung nahigugma ka niini, nan ang gugma sa Dios wala kanimo.” Ang Biblia nag-ingon niana.

Karon tan-awa. Miingon siya, “Sige ipakuha siya.” Ug miadto sila.

¹³⁴ Ug dayon nagpadala siya og mensahero, ang diyakono sa iglesia, tingali, o kung kinsa man, miadto didto ug miingon, “Karon tan-awa, Micheas, dad-on ka namo didto sa atubangan ni Ahab ug ni Josaphat. Karon, silang duha naglingkod didto, ug bantugan sila nga mga tawo. Mga magtutudlo sila ug mga iskolar. Ug sila adunay mga digri, ug uban pa. Ug ang matag usa sa among seminaryo, ang matag usa sa among mga kasimbahanan dinhi, hingpit nga nanagkauyon nga kini mao ang kabubut-on sa Ginoo. Karon, isulti pud ang sama rang butang nga ilang gisulti, ug, sultihan ko ikaw, mahimong mas maayo na ang imong pamisti ug magsakay na gyud ka sa Cadillac nga sakyanan. Sultihan ko ikaw, mahimo gyud kang inila nga tawo kung buhaton nimo kana. Oo, sir. Molambo gyud ka.”

¹³⁵ Miingon si Micheas, “Ingon nga buhi ang Ginoong Dios, igasulti ko lamang kung unsa ang gisulti sa Dios.” Amen. Oo. Oh, kana ang tawong nahiuyon gayud sa akong kasingkasing. “Magkaon man ko’g tinapay na lang ug tubig,” nga natinuod gayud, “tungod sa pagbuhat niadto.” Nasagpaan man siya sa usa ka aping ug sa pikas aping, o kung unsa pa man, apan iya mismong gisulti ang Kamatuoran ug gibarugan kini. Gipamatud-an kadto sa Dios nga mao ang Kamatuoran. Dili man kaayo siya inila, apan nakaila siya sa Dios.

¹³⁶ Gidala didto ang tigulang nga si Micheas. Ingon pa didto, “Sige, Micheas, unsa ma’y imong ikasulti bahin niini?”

¹³⁷ Miingon siya, “Tumungas kamo. Tungas mo didto.” Miingon pa, “Tumungas mo didto, sa kalinaw. Sige adto mo, og magmauswagon, kana ang gusto kong buhaton ninyo. Apan akong nakita ang Israel sama sa mga karnero, nga walay magbalantay, didto sa kabungturan, nga nagakatibulaag. Mao lang kana,” ingon pa niya.

¹³⁸ Ug pagkahuman niya’g sulti niadto; ug milingi si Ahab ngadto kang Josaphat, miingon: “Unsay akong gisulti nimo? Kana nga holy-roller . . .” o, unsa ba, pasayloa ko, o, unsa man kini; miingon kadtong tawhana, “Kana . . . Unsa kadtong gisulti ko nimo? Kanang tawhana nagapanagna lang og dautan—dautan batok kanako. Unsay akong gisulti? ‘Kondenahon niya lang ang among simbahan, ug kondenahon ang among mga ministro, ug kondenahon ang among paagi sa relihiyon.’ Unsa na’y gisulti ko nimo? Nga isulti gyud niya kini. Nakaila na ko niya. Kaila pud ko sa iyang amahan nga nauna kaniya.” Amen. “Kaila pud ko sa iyang amahan nga nauna kaniya.” Uh-huh, oo, sir, tinuod

nga alagad sa Dios. Ingon pa, “Nasayod ko nga isulti gyud niya kana.”

¹³⁹ Ug niadtong tungora miingon siya, “Oo,” miingon, “Akong nakita ang Israel sama sa karnero, nga nagkatibulaag, walay magbalantay, didto sa kabungturan.” Ug mao nga ang ingon pa niya, “Akong na- . . .”

¹⁴⁰ Ug dayon ang usa niadtong mga kalalakin-an nga may gihawiran nga dakung mga sungay, ang misibog, usa ka magwawali, miduol ug gibira ang diyutay’ng si Micheas, ug gisagpa siya sa baba nga grabe ka kusog, miingon, “Asa mang direksyon miadto ang Espiritu sa Dios sa dihang Kini migula gikan kanako? Kung nasayod ka.”

¹⁴¹ Miingon, matud pa niya, “Paghulat lang hangtud nga nabalhog ka na sa bilanggoan dinhi, ug masayran nimo kung asa Kini mipadulong.” Husto kana.

¹⁴² Hulata lang nga makaadto na ang Rusya, sakupon ang mga nasud ug mga butang nga ingon niana, ug bisan kini nga nasud, tungod sa pag-backslide niini, ug inyong masayran kung unsa ang husto ug sayup. Husto kana. Diha ninyo makita kung ang inyong dagaang nga relihiyon mapuslan ba kaha, o dili.

¹⁴³ Iugot kining nasura nga mapaingon sa pagluha, dili sa pagkatawa ug pagdrama. Ipaluhod kining nasura, diha sa paghinulsol. Mao kana ang atong gikinahanglan. Dili usa ka rebaybal aron makadani og daghang mga tawo sa simbahan. Kinahanglan natong sirad-an ang matag balay-imnanan, hunongon ang pagpanigarilyo, gub-on ang mga pabrika niini. Sugdan ang usa ka tinuod, kinaraan, nga buluhaton nga iya sa Espiritu Santo; diin ang mga kalalakin-an ug mga kababayen-an, sa matag adlaw ug gabii, magahapa, ug magahilak. Sultihan ko kamo, kini ang mahimong labing luwas nga dangpanan nga maangkon niining nasura. Tinuod kana.

¹⁴⁴ Ipahunong sa Branham Tabernacle ang kabuang niini. Ipahibalik kini dinhi sa altar ug magpasig-uli sa Dios. Makighusay sa mga silingan, ug uban pa nga sama niana, ug magpasig-uli sa Dios. Wala na kamo og unsa man nga mga pagpakiglantugi ug mga ingon-niana; ug mamahimo kining lugar nga nagakabig sa kalibutan. Husto kana. Karon, mao kana ang kamatuoran.

¹⁴⁵ Dayon miingon siya, “Asa mang direksyon miadto ang Espiritu sa Dios nga migula gikan kanako?”

¹⁴⁶ Ug miingon si Micheas, “Akong nakita ang Dios, ug ang Iyang panon, ang Iyang konseho, nga atua sa Himaya.”

¹⁴⁷ Abi ninyo, ang Dios adunay konseho Didto, usahay. Iyang—Iyang ginapaanha ang Iyang—Iyang mga Langitnong Linalang ug magpahigayon og usa ka—usa ka pakigpulong, usahay, didto sa Langit.

148 Ug miingon siya, “Nakita nako Siya nga naglingkod sa usa ka Trono, ug ang tanang mga binuhat nanagtindog sa Iyang tuo ug wala.” Ug miingon, “Nag-istoryahanay sila, ‘Kinsa kaha ang atong masugo aron moadto didto ug limbongan si Ahab, aron mapaadto siya didto ug aron matuman ang propesiya ni Elias? Giingon na man gud kini sa Dios, kung unsa ang mahitabo, maong ato na lang tan-awon kung kinsa ang mapaadto nato didto.’

149 “Ug misaka ang usa ka bakakon nga espiritu gikan sa ubos,” siyempre, gikan sa impyerno, “mianha atubangan sa Dios ug miingon, ‘Ako ang moadto, ug mosulod ako niadtong mga magwawali ug ipapropesiya sila’g bakak.’” Oh, nangakurat gyud sila niadto. Nagpabati gyud kadto kanila og talagsaon nga pagbati, niadtong, “Miingon sila, ‘Manaug ko ug ipahinabo niadtong mga magwawali, ang matag usa kanila, nga magpropesiya og bakak.’” Ug nanaug siya ug misulod niadtong mga magwawali, ug nagsugod sila sa pagpanagna og bakak.

150 Ug, igsoon, ang mao ra nga Dios nagahari sa mao ra nga Trono karon. Ug kanang mao ra nga bakakon nga espiritu nagbuhat pud sa samang butang karon, nagapropesiya’g mga bakak.

151 Nagsige sila’g ingon kaniadto, “Kalinaw, kalinaw, kalinaw,” human sa Nahaunang Gubat Pang-kalibutan.

152 Tugoti kong ipakita kaninyo kung diin kini naggikan. Niadtong Nahaunang Gubat Pang-kalibutan, sa dihang ang Pransya, kaniadto, mitalikod sa Dios, niadtong ilang Gay Nineties, ug nagsugod. . .

153 Karon maghisgot ko’g gamay mahitungod sa moralidad, maong maglingkod lang kamong tanan nga hilom sulod sa pipila ka minuto.

154 Tan-awa n’yo, kaniadto, sa sinugdanan, didto sa Pransya, didto nagsugod ang imoralidad ug kahugawan. Kung aduna ma’y usa ka langub sa mga ilaga sa kalibutan, kini mao ang Paris, sa Pransya. Ug halos nabiyahe ko na ang tibuok lugar niini, ug kana ang pinakadautang dapit nga akong nakita sukad. Ug ang London, sa Inglatera wala pu’y kalainan. Ug ang Estados Unidos mosunoray na pud niini. Husto kana. Mao kana sila.

155 Sa matag higayon nga inyong gub-on ang moralidad sa pagka-babaye, inyong giguba ang dugukan sa nasud.

156 Pagmoadto ka, sa ilang mga nasud, ug moingon nga ikaw usa ka misionaryo, dili sila ganahan. . . Moingon, “Unsa na pud kaha imong isulti namo nga among buhaton, kung unsaon ba pagkanta og malaw-ay nga mga kanta mahitungod sa among mga asawa, o mahitungod sa among mga batan-ong babaye? Sultihan mo na usab kami kung unsaon sa pagpakigbulag sa among mga asawa? Tudloan kami kung unsaon pag-inom og

whiskey ug magkinabuhi sama sa among pagkinabuhi?” Ingon-ana bitaw tà.

¹⁵⁷ Ginatawag nato ang atong kaugalingon nga relihiyosong nasud, Cristohanon nga nasud. Bueno, silang “mga pagano” didto sa Africa mas makatudlo pa kanato og bahin sa moralidad, unsaon pagkinabuhi. Ang pinakadautan nga dapit, sa Estados Unidos, o, sa kalibutan, halos, mao kining nasura, ang kahintang niini. Tuod man, usa ako ka Amerikano. Pero, igsoon, dili nako mapugngan, sama kaniadto sa atubangan ni Ahab o ni Josaphat. . . Ug kinahanglan kong isulti kung unsa gayud ang giingon sa Dios nga Kamatuoran. Mao kana ang angay nga barugan sa iglesia, karon. Kung papilion man kita ugaling tali sa nasud ug sa Dios, ang Dios gyud, sa kanunay. Oo, sir.

¹⁵⁸ Matikdi, didto sa Pransya, nagsugod sila sa tanan nilang pagkadautan, ug nagpadayon sa pagkinabuhi nga ingon niana didtoa. Ug dayon gipadala sa Dios ang Alemanian ngadto kanila, aron panglapdusan sila og gamay. Dayon nangilabot tà aron luwason sila. Ug pagkahuman natong gibuhat kadto, ug nagmadaugon sa gubat, gipapauli ang mga Aleman, nakighusay sa Pransya, nagpasig-uli ba sila sa Dios? Wala, sir. Nanagpatuyang sa pambabaye, bino, kaulagan, sala ug kahugawan nga hangtud na sa hasang.

¹⁵⁹ Dayon unsay ilang gibuhat? Unsay nahitabo? Dinhi siya nagsugod. Ang yawa nagbutang sa iyang punoan’g buhatan didto. Didto siya nagsugod, didto mismo, aron gub-on ang moralidad sa kalibutan, gikan sa Paris, Pransya.

¹⁶⁰ Dayon, kung namatikdan ninyo, dili siya makasulod dinhi pinaagi sa ministerio, busa ang iyang gibuhat mao ang pagsulod sa Hollywood dinhi. Iyang gibutang ang iyang Holl- . . . Gitukod niya ang iyang punoan’g buhatan dinhi sa Hollywood. Napadpad ang yawa dinhi, mga pipila na ka tuig ang milabay, kinse o baynte ka tuig ang milabay, uban sa iyang daghang kasundalohan, ug miadto mismo, didto sa Hollywood, California. Ug iyang gisakup ang Estados Unidos gamit ang iyang demonyong gahum. Husto kana. Ang tanan natong mga urog naggikan sa Paris. Gidala nila kini sa Hollywood, sa mga salida. Kining batan-ong mga babaye ug batan-ong mga lalaki, ug mga ingon niana, nasagop kining mga butanga, kay nagatan-aw man sila’g mga salida.

¹⁶¹ Matahum nga gagmay’ng mga bata, buotan nga mga bata, wala ko’y unsa man nga batok kanila. Panalanginan sa Dios ang ilang gagmay’ng mga kasingkasing. Nagadugo ang akong kasingkasing alang kanila.

¹⁶² Ug dinhi mismo sa siyudad, nakigsulti ko sa akong . . . usa sa . . . akong anak nga lalaki, niadtong miaging adlaw. Ingon pa niya, “Daddy, kung naa lang unta’y mga pipila ka batan-ong lalaki sa palibot, dinhi sa lungsod, nga adunay Espiritu

Santo,” ug uban pa. Maong nahibulong mo nganong nagadayo ko didto sa Denver, Colorado, o sa ubang lugar nga sama niini? Ginadala nako ang akong mga anak ngadto sa kon diin adunay pundok sa mga tawo nga nagatuaw sa Dios; mao kana ang atong gikinahanglan, igsoon.

¹⁶³ Kini nga yuta, kini nga nasud, kini nga siyudad, kini nga dapit, daut na kaayo ang moralidad nga makaluluoy na. Kung mahimo lang unta nakong ipahayag karon dinhi mismo kung unsa gyud ang akong nahibaloan nga kamatuoran niini, dili gyud kini angay’ng madungog sa nagkasagol nga tumatambong. O, dinhi mismo sa kaugalingon kong siyudad; dili lang diay dinhi, kondili sa uban pud nga mga dapit, bisan asa mismo, naghinayhinay na kini’g kahimong usa ka . . .

¹⁶⁴ Kay ngano man? Ang mga tawo . . . Tan-awa, mga higala, malimbongon na kaayo kini. Sayon ra kaayo kini nga nakasulod, hangtud nga matuuk na ka niini. Ang yawa anaa sa mga urog kaniadto pa. Tingali dili na kaayo siya anaa sa mga urog, apan dili nga wala na siya sa maong buluhaton, sultihan ko kamo niana. Anaa gihapon siya sa maong buluhaton.

¹⁶⁵ Tan-awa n’yo, karong panahona. Ipananglitan nato, sama sa akong gihisgotan bag-ohay lang, mahitungod sa gamay’ng gining, usa ka batan-ong babaye nga dunay gihawiran nga rosas. Pananglitan, ang rosas, matahum kini; gibutang kini diha aron matan-aw, tinuod kana. Ug ingon-ana ra sàb ang iglesia, gipahimutang kini diha aron tan-awon. Sama sa usa ka matahum nga babaye, anaa siya diha aron tan-awon. Husto kana. Pero kung siya . . . Kung siya’y maayo, kanang, maayo siya nga asawa sa iyang bana, okey—okey siya. Apan kung wala siya’y nakaandam na nga espada sa moralidad dinha aron magpanalipod kaniya, nagakahimo siyang kaulawan sa katilingban ug sa mga tawo; ubos ang dungog ug nahimong usa ka salawayon ug imoral na kaayo nga bisan ang mga iro ayaw motan-aw kaniya. Husto kana.

¹⁶⁶ Ug ingon niana usab kini sa Iglesia sa buhi nga Dios. Manggawas sila dinhi ug paninguhaon nilang mahimong madanihon ug maanyag ang ilang panagway, ug manggawi sama sa . . . Ginahuboan nila ang ilang mga kababayen-an dinhi, mismo sa . . . ug wala maamgo sa mga tawo nga gisakup na diay sa mga yawa ang inyong mga panimalay.

¹⁶⁷ Dinhi mismo sa akong mga silingan niadtong miaging adlaw, usa ka batan-on nga babaye, nga sa akong tan-aw usa ka buotan nga babaye, ug minyo na siya, duna na’y anak, ug ang maong babaye migawas didto, ug dihay usa ka lalaki nga naay gitrabaho sa dalan, ug kining babaye migawas didto nga nagsul-ob og mugbo nga bisti, law-ay gyud kaayo.

¹⁶⁸ Usa kini ka dili maayo nga pahayag alang sa Adlaw sa mga Inahan, pero, igsoon ko, tugoti ko nga isulti kining usa ka butang

kaninyo: Inahan, balik na kamo sa pagka-inahan pag-usab!

¹⁶⁹ Bisan ang kadtong batan-ong lalaki nga mibisita sa among lugar, misulod ug gisultihan kami bahin niini, “Tan-awa n’yo didto.”

Miingon ko, “Bueno, wala gyud.”

¹⁷⁰ Usa ka buotan man kadto nga babaye. Wala ko nag-ingon nga daut ang iyang moralidad. Pero, ang punto niini, adunay mahilas, mahugaw nga espiritu nga anaa kaniya, nga mao’y nagapabuhat kaniya niana, ug wala siya mahibalo niini.

¹⁷¹ Unsa ba gyu’y hinungdan nga ang usa ka inahan, o kinsa man, ganahan man gyud mosul-ob nianang mugbo og malaw-ay nga mga bisti, ug ibandera ang ilang kaugalingon atubangan sa mga lalaki? Maanyag ka, igsoong babaye. Maanyag ka, inahan. Nagapasalamat ko sa Dios para nimo. Pero, bisan pa’g maanyag ka, pero kung wala ka’y Espiritu Santo nga manalipod nianang moralidad, mas maayo pa nga maut na lang kaayo ka nga walay ganahan motan-aw nimo, ug mahiadto ka sa Langit. Husto kana. Tinuod gyud kana. Bantayi ang inyong ginabuhat; kanang moralidad.

¹⁷² Karon, ang nahitabo, nakasulod ang yawa ug ginapugas kining mga butanga sa mga tawo. Misulod siya sa mga magwawali; mao nga iya nang gihimong sumbanan ang Hollywood. Ang mga batang babaye ug sila nga mga dalaga na, ginasundog na nila ang Hollywood. Ang pinakamakadani nga butang nga aduna sa tibuok nasud karon, mao ang pinakaimoral nga imong madungog, ang mga hilisgotan; tanang sultihanay sa radyo.

¹⁷³ Aduna pud og mga tigulang nga babaye nga sama ni Miss Kay Starr, wala ko’y kontra kaniya; pero ang makita ang usa ka tigulang na nga babaye, singkwenta’y anyos, ug tanan na, nga nagsul-ob og mga bisti nga grabe ka huot, nga mora siya’g gihuho sa sako sa harina. Wala nako ginasulti kana para magpakatawa, tungod kay nagahisgot man ako batok niana nga mga butang. Apan kung ang usa ka babaye nagapanggawi og sama niana, ug magpakita ug mamahimong ehemplo ngadto sa mga batan-ong Amerikano, usa kini ka kaulawan sa atong nasud. Ang yawa kini.

¹⁷⁴ Aduna pud og mga lalaki nga sama kang Arthur Godfrey ug sila nga nagkatag dinhi, nagabuhat sa mga butang nga ilang ginabuhat, ug mga inila kaayo nga mga kalalakin-an sa nasud nga ingon niana, ug, aba, makauulaw gayud.

¹⁷⁵ Alleluyah! Ginasulti ko kana tungod kay gibati nako nga ania ang Balaang Espiritu. Nagapadayon ang maong pagpanakup, paspas nga nagakaylap sa matag panimalay, sa matag dapit, sa matag iglesia, sa matag tawo.

176 Mga anak, sa Ngalan ni Jesus Cristo, mangbarug kamo sa baruganang moral sa rebaybal ug sa Ginoong Jesus Cristo, ug moingon, “Pagapilion ko ang dalan nga kauban ang pipila ka mga tinamay nga iya sa Ginoo.” Oo, sir. “Ako’y mahimong tinuod nga inahan.” “Ako’y mahimong tinuod nga amahan.”

Sa diha nga ang tibuok kalibutan, ug ang tibuok palibot, ang tanan nga nagpalibot sa akong kalag mahugno na,
Nan Siya ang tanan kong paglaum ug tabang.
Kay kang Cristo, ang malig-ong Bato, ako nagabarug;
Ang tanang ubang mga dapit balas lang nga nagakaunlod,
Ang tanang ubang mga dapit . . .

177 Unsa ma’y hinungdan niining tanang mga butang? Unsay hinungdan nganong nagapanggawi man og ingon niini ang mga ministro? Unsay nakaaghat sa mga magwawali aron ipropesiya kini nga bakak ngadto sa mga tawo?

178 Nganong, daghang mga tuig na ang milabay, nga kamong mga Methodist . . . Kaniadtong ginaspnay na lang si John Smith padulong sa iyang pulpito, aron isangyaw ang Ebanghelyo, ug siya nagwali og usa ka mubo nga sermon sulod sa upat ka oras. Ug miingon siya, “Ang problema mismo, kung nganong nagakasubo ang akong kasingkasing.” Ingon niya, “Ang mga anak nga babaye sa Methodist nagasul-ob na og mga singsing sa ilang mga tudlo.”

179 Ug, karong panahona, nagsul-ob na sila’g mga short ug mga mugbo og malaw-ay nga mga bisti. Ug mamahimo na gyud silang hubo, mga lima ka tuig pa, kung walay pagabuhaton. Unsa na ma’y nahitabo kaninyong mga Methodist nga magwawali, kamong mga Campbellite, kamong mga Baptist? Oo, sir. Ang yawa kana, nga nagsabwag sa iyang mga gahum, ug iyang gipakatag ang iyang mga alagad dinhi.

180 Ug wala mo nakaamgo niini, kamong mga nagapanigarilyo, kamong mga kababayen-an, ug nagabuhat nianang inyong mga ginabuhat diha, ug nagainom og mga makahubog ug nagapatuyang sa inyong mga ginabuhat, wala n’yo maamgo nga inyo lang ginahiloan ang inyong sistema, ug ginadaut ang tibuok nga mga henerasyon nga mosunod ninyo, kung aduna man. Otsenta’y-singko porsyento nga mas daku ang posibilidad nga makakuha ka’g kanser, tungod sa pagpanigarilyo, ug ginatuyo n’yo mismo nga moduol sa mga ingon niana. Ug ginaendorso pa sa mga kasimbahanan.

181 Sa usa ka dakung simbahan sa Baptist, dinhi lang, bag-ohay pa lang . . . Ginasaway ko ang Baptist. Aduna ko’y katungod niana; medyo na man gud sila mihandig sa kung asa ako mibiya kaniadto. Mao diy nga nagatagana sila’g panahon sa pahulay

tali sa panerbisyo sa Sunday school ug sa panerbisyo sa pagwali, aron ang pastor ug ang tanan makagawas ug makapanigarilyo pa, ug sa dalan pa mismo nga naglinya ang mga kalalakin-an ug kababayen-an nga nanigarilyo. Ang yawa ang nagpahinungdan niana. Husto kana.

¹⁸² Dayon, dinhi sa atong kaugalingong siyudad, usa sa atong pinaka-inila nga mga ministro, dinhi mismo sa New Albany, sa may dulaanan dinhi, nagpasiugda ang usa sa atong pinaka-inila nga mga ministro sa siyudad og usa ka square-dance nga programa, para kono danihon ang mga kalalakin-an ug kababayen-an nga mag-adto sa mga entablado.

¹⁸³ Wala ko'y labot kung unsa ang ikasulti sa kalibutan, wala ko'y labot kung giunsa man ninyo pagpang-awhag mahitungod niini; igsoon, walay kaagresibo nga lalaki nga moduol sa asawa sa ubang lalaki, ug wala ra'y bation. Nasayod gyud mo nga mao kana ang kamatuoran.

¹⁸⁴ Ilang gikuha ang atong mga kababayen-an, ug gihuboan sila; nagtrabaho na man gud sila sa mga opisina, ug nagamaneho na'g mga taksi, ug nagaadto-nganhi sa kadalanan. Diin, angay nga sa balay ra sila unta, atubang sa lutoanan, nagaluto, ug nagaandam og panihapon.

¹⁸⁵ Unsa man kini? Ang yawa kini. Nagapadayon na ang pagpanakup. Wala ko'y ginaingon mahitungod kung kinsa nga indibiduwal *kini* o *kana* nga indibidwal. Ang ginaingon ko nga mga mahugaw'ng espiritu kini nga nagkontrolar sa mga tawo, nga nagatukmod kanila ngadto niini. Ang pagpanakup sa Estados Unidos.

¹⁸⁶ Ang pagkapukan sa iglesia. Gibuntog na sa yawa ang iglesia. Sukad sa unang. . .

¹⁸⁷ Ilang paeskwelahon ang usa ka bata nga lalaki, ug sa iyang pag-abot sa seminaryo, ang unang butang nga iyang kinahanglan makat-onan mao ang pagkuha sa iyang mga digri. Kinahanglan niyang mokuha og sikolohiya. Kinahanglan niyang mokuha og teolohiya. Kinahanglan matudloan siya, matudlo sa iyaha ang tanang matang sa mga butang. Kung wala siya'y maayong edukasyon, kon dili siya ingon niana ka maalamon ug ingon niana ka maantigo, palagputon siya; dili siya mahimong kuwalipikado. Unsa man diay ang angay niya untang buhaton? Mogawas siya dinhi ug magpresentar og hamubo nga politikanhong pagpamulong, sama sa naandan na, usa ka politikanhong pagpamulong sa iglesia, ngadto sa usa ka grupo sa mga tawo, usa ka pundok sa mga lalaki ug babaye nga himalasyon na.

¹⁸⁸ Oh Dios, ipadala kanamo ang mga maka-kinaraan, mga sassafra nga mga kalalakin-an bisan wala mahibalo sa kalainan sa A gikan sa B, pero nakaila sa gahum sa pagkabanhaw sa Ginoong Jesus Cristo, nga magawali og paghinulsol, ug paduolon

ang mga kalalakin-an ug mga kababayen-an ngadto sa altar, aron higugmaon ang Ginoong Jesus. [Blangko nga bahin sa teyp—Ed.]

¹⁸⁹ Usa kini ka kalautan. Nasakup na niya ang mga seminaryo. Nasakup na niya ang mga kasimbahanan. Iyang gihuboan ang atong mga kababayen-an. Gidala na niya ang atong mga kalalakin-an ngadto sa usa ka kahimtang diin dili mo na sila masultihan og bisan unsa. Ug ang mga kalalakin-an ug kababayen-an, sa tan-aw ko . . .

¹⁹⁰ Moingon mo, “Buena, ang mga kababayen-an gyud.” Oo, ug kamong mga kalalakin-an nga ginatugotan ang inyong mga asawa nga buhaton kana, nagpakita lang gyud kana kung unsa mo. Eksakto gyud kana. Tinuod. Makauulaw gyud kini. Alaut gayud.

¹⁹¹ Ug dayon ngadto sa magwawali. Motindog ang magwawali diha sa entablado, karon, sa modernong pulpito. Motindog siya dinha, atubangan sa iyang mga miyembro, ug magwali mahitungod sa tanan nang gamay’ng butang sa kalibutan gawas sa paghinulsol ug sala, ug sa sagapsapon nga krus ni Cristo. Oo.

¹⁹² Kung imong ilatag ang mga kamatuoran; tinuod manambong ang mga tawo aron maminaw kanimo, sa pang-ebanghelyo nga panerbisyo. Pero pagmoabot na gani ka sa mismong butang ug iwali ang Ebanghelyo, ug pahinulsulon ang mga tawo ug tul-iron sila. Manindog sila ug manggawas, dili sila ganahan maminaw Niini. Dili, dili gyud sila ganahan. Pero, mga kaigsoonan, kinahanglan nilang maghinulsol kay kondili mangalaglag sila.

¹⁹³ Mga demonyo! Pagmoadto ka sa eskwelahan; gisakup na niini ang mga eskwelahan. Tan-awa n’yo ang palibot, sa tibuok nasud karon. Tan-awa mo dinhi, kamo dinha, kamong mga Protestante. Tan-awa n’yo, adunay upat ka dagkung Katoliko nga mga eskwelahan ug mga ingon-ana, nga gitukod karon. Nganong ingon-ana man? Tungod kay gipaubos man ninyo ang mga sukaranan.

¹⁹⁴ Wala man ko’y batok sa Katolisismo, bisan nga wala ko nagatoo niini. Usa ako ka bug-os nga Protestante. Eksakto gyud kana. Mapamatud-an ninyo nga dili sila . . . Dili ka na puedeng makiglalis nila. Moingon sila, “Wala mi’y labot kung unsa ang ginaingon sa Biblia. Ang nahibaloan namo mao’y kung unsa ang ginaingon sa simbahan.”

¹⁹⁵ Ang Dios anaa sa Iyang Pulong. *Dinhi* mao’y kung asa ang Dios.

¹⁹⁶ Apan ang pipila sa mga Katoliko, nga nagaunong gyud sa ilang simbahan, makapaulaw nimo sa imong kaugalingon, ingon nga usa ka Protestante. Kung ingon-ana lang unta ang inyong pag-unong sa Biblia, sama sa ilang pag-unong sa ilang simbahan. Husto. Pero, sayup sila. Makasulti gyud ko niana ubos

sa awtoridad sa Makagagahum nga Dios, nga, sayup sila. Sa walay pagduhaduha.

¹⁹⁷ Ug kamong mga Protestante sayup pud kamo, sa inyong ginabuhat, kay mas nasayod unta kamo, pero inyo sa gihapon ginabuhat kini. Mao kana ang nagapahimo kaninyo nga hipokrito. Sigurado, tungod kini sa maong pagpanakup; mga iglesia nga ginaubos ang sukaranan. Ug karon imbis nga . . .

¹⁹⁸ Ang iglesia, ginatinguha nga mahimong maanyag ang simbahan, magtukod og mas daku nga simbahan, magbutang og mga tag-as nga tusok niini, dagkung mga pipe organ, ug paninguhaon nga himoon ang tanan nga mahimong susama sa simbahang Katoliko. Ayaw gyud sunda ang simbahang Katoliko, kung gitakda na kini paingon sa kalaglagan. Kay, kana'y MAO KINI ANG GINAINGON SA GINOO, siya'y gitakda na nga mopaingon sa mga kalaglagan. Ug kung nagasundog-sundog mo sa iyaha, mag-kuyog gyud mo.

¹⁹⁹ Apan ang atong gikinahanglan karon, dili usa ka daku nga simbahan, usa ka taas nga tusok, kondili usa ka kinaraan nga mga altar diin ginasunog ang mga sala, ubos sa napahinungod nga mga pag-ampo gikan sa mga kalalakin-an ug mga kababayen-an nga mga nahigugma sa Ginoong Jesus Cristo. Kabalo na kamo niana. Mao kana ang atong gikinahanglan. Paminaw mo kanako, mga higala. Paminawa ko. Gugma kini.

²⁰⁰ Wala na ko'y igong oras. Gusto pa unta nako magdugay pa dinha, diin, siguro, ipadayon na lang nako kini, sa sunod, mahitungod nianang pagpanakup, kung hain na kini nakaabot. Nangsakup gyud kini. Nasakup na niini ang atong nasud. Nasakup na niini ang Estados Unidos.

²⁰¹ Karon hinumdumi ninyo, wala pa gyud ko nakaboto sukad sa akong kinabuhi, kita n'yo, dili kana usa ka butang nga ikapasigarbo, katungod ko kana isip usa ka Amerikano kung gusto ko nga buhaton kana. Pero gihunahuna gyud nako ang akong mga higala, nga mapahimutang sila sa niana nga kahimtang. Tan-awa n'yo, nakita ko sila nga misulod ingon nga disenteng mga tawo, og migawas ingon nga mga tikasan na, ug dili ko gusto niana.

²⁰² Aduna ko'y usa ka tumong. Ania ako nga ginapahimutang ang usa ka plataporma alang sa usa ka Persona Nga mao ang Kandidato, ug kana mao si Jesus Cristo, ug Siya lamang. Akong ginahatag ang akong oras para Kaniya. Husto kana. Ug kung akong maitul-id ang iglesia, mosunod na niana ang tanang uban pa sa kalibutan. Husto kana.

²⁰³ Pero sultihan ko kamo, kaniadtong si Mr. Roosevelt (Patay na ang maong tawo, papahulayon na nato siya, ako nagasalig nga nakapahulay na tuod siya.), napili, ug midagan sa tulo o upat ka termino, ug milingkod sa katungdanan, unang lakang ra kadto paingon sa pagka-diktadurya, mapamatud-an ko kana kaninyo

diha sa Kasulatan, kon diin akong gisulti nga mahitabo gayud kini. Husto kana. Wala na kita'y Konstitusyong, gikuniskunis na kini, ang tanan taphaw na lang para kanila. Sama ra pud ka dautan ang mga Republican, pareho ra sila sad-an, ug walay kalainan tali kanila.

²⁰⁴ Kay, ang matag gingharian pagadugmukon, apan ang Gingharian ni Jesus Cristo magabarug ug magahari hangtud sa kahangturan. Husto kana. Sa ibabaw... Nakita ni Daniel ang maong Bato nga gisapsap gikan sa kabukiran, ug miigo sa pulitikanhong kalibutan kaniadto ug gidukmok kini nga daw sa usa ka ginaling nga pulbos, sama sa trigo diha sa salog nga giukan sa panahon sa ting-init. Pero kana nga Bato nahimong usa ka dakung bukid nga gilukop ang ibabaw sa kala... nga milukop sa tibuok langit ug yuta. Mao kana.

²⁰⁵ Nawala na ang kalibutang pulitikal. Nahapay na ang atong nasud. Timan-i ninyo kana, nga gisulti kana ni Igsoong Branham, MAO KINI ANG GINAINGON SA GINOO. Nalusno na gyud ang atong nasud. Dili na kini makabangon pa. Wala na siya, sama sa tanang uban pang mga nasud. Kini ang pinakagamhanan nga nasud sa kalibutan, nga nagbarug karon, apan ang binhi sa yawa naipugas na ngadto sa mga kasingkasing sa mga tawo; misulod kini sa Hollywood, mikaylap sa mga tawo, ug misugod sa *ingon niini*. Ug dili mo na sila masultihan og bisan unsa.

²⁰⁶ Magbutang kamo dinha og usa ka Presidente nga maninguha sa pagsanta sa whiskey, karon ug idumili kini, tan-awa kung unsay mahitabo. Pusilon siya, duha lang ka oras human siya nga molingkod dinha. Sigurado, dili gyud siya makalahutay; ang tibuok kalibutan mamahimong batok kaniya. Oo, sir. Dili gyud nimo mahimo kini.

²⁰⁷ Wala na kining nasud. Nasakup na gyud siya, ug mipuli na ang espiritu sa komunismo.

²⁰⁸ Adto mo sa atong mga eskwelahan karon, tan-awa ang atong mga anak nga nag-eskwela. Ang atong gagmay'ng mga anak nga nag-eskwela, kinahanglan nga mahibaloan n'yo kung unsa na'y nagakahitabo. Ang mga batan-ong babaye dinhi sa mga eskwelahan, ug mga butang nga sama niana, sa edad nga katorse ug kinse, gipaeskwela sila sa ilang mama, pero nadaut na ang moralidad, ang mentalidad, migamit na og droga, naadik na sa droga, nagapanigarilyo na, tanan na nga sama niana; sa ingon ka bata nga pangidaron, ingon-ana na ang gagmay'ng mga bata. Maglisud na ka'g makakita og birhen taliwala kanila sama sa malisuran ka sa pagpangita og dagom diha sa mga dagami, tungod kay nakigdulog-dulog na sila sa batan-ong mga lalaki, ug nagapauraray diha sa mga tampi sa suba ug sa bisan asa na lang nga dapit.

209 Ug mapamatud-an ko kini kaninyo, akong mga higala. Dili ko kini isulti sa pulpito gawas kung nasayod ko sa akong ginasulti. Sa mga eskwelahan dinhi sa ato—sa atong mga lungsod, dinhi mismo sa atong kaugalingong mga lungsod, bahin niining mga nanagdayandayan nga mga batan-ong babaye, wala gyud nasayod. . . nananghid sila sa ilang mga inahan nga moadto kono sila sa kung asang mga dapit, ug makigtambo ra diay sa mga batan-ong lalaki ug magbiniga pa gani sa mga kadalanan sa Louisville (Unsa man kini?), ug dayon mokanta sa simbahan.

210 Tungod kay, aduna lamang sila'y pang-sosyedad nga Ebanghelyo nga ginawali didto, kon diin ang mga magwawali nagatindog ug nagahisgot mahitungod ug mabaw nga mga butang, ug gagmay'ng mga sugilanon sa Biblia, o butang nga sama niana, imbis nga magwali mahitungod sa paghinulsol ug paduolon ang mga kalalakin-an ug mga kababayen-an ngadto sa altar.

211 Ang iyang amahan pagmoabot sa gabii ug magdagkot sa iyang sigarilyo, mokuha og usa ka baso nga beer, dayon molingkod ug moinom niini. Samtang ang inahan tua sa gawas, sa tibuok adlaw, kauban ang usa ka pundok sa mga kababayen-an didto nga nagadula og baraha, o mga panagtapok nga sama niana. Unsaon man nimo pagdahum nga ang bata dili mamahimong ingon niana?

212 Tan-awa n'yo, kung unsang klase nga palibot ang imong ginapuy-an, mao pud ka.

213 Pananglitan sa usa ka batan-ong babaye, usa ka batan-ong lalaki, ibutang sila dinhi, pasagdi sila nga magpuyo uban sa usa ka tawo. Pananglitan ang usa ka lalaki, pananglitan na lang sa akong anak nga lalaki, pasagdaan nako siya nga mouban sa usa ka tawo sa usa ka tibuok adlaw; pag-uli nako, kanunay gyud nakong maila kung kinsay iyang nakauban. Sigurado gayud. Bantayi, kanang nakapalibot kaniya, maimpluwensyahan gyud siya nianang espirituha.

214 Moadto ka sa usa ka simbahan, diin ang tanang mga tawo. . . tambong ka sa Espiritu Santo nga mga kasimbahanan, o—o sa Pentecostal nga mga kasimbahanan, mao ma'y tawag nila niini. Pasagdi nga ang tanan. . . Oh, nanagdalan sila ug nagayango-yango sila sa ilang mga ulo, mao man diay ang ginabuhat sa pastor; himatikdi nga mao gyud ang ginabuhat sa tibuok iglesia. Matikdi ninyo ang mga kalalakin-an, ang mga tawo, nga motindog ug—ug kung unsa ang ginabuhat, o lahi na pud ang buhaton; makita ninyo nga ang tanan buhaton pud kana. Sulay mo'g sulod sa usa ka lugar kon diin ang pastor pormal kaayo ug bugnaw; matikdi nga ang tibuok pundok ingon-ana pud. Pagmakaanha ka niana nga palibot.

215 Tan-awa n'yo ang usa ka lalaki nga maayo'g moralidad, ug ipakasal siya sa usa ka babaye nga mas may bili pa ang usa ka

sentimos kay sa iyaha; dili magdugay mamahimong ingon-ana na lang pud ang bili sa maong lalaki. Mao kana ang nahitabo kang Ahab. Mamahimong ingon niana usab, kung balihon mo, nga ipakasal ang usa ka maayo og buotan nga babaye sa usa ka lalaki nga mas daku pa ang bili sa usa ka sentimos; mahibaloan mo na lang, ginabuhat na pud sa babaye ang butang nga ginabuhat sa maong lalaki.

216 Mahimo gani nako, karong buntaga, nga ipunting ang pipila ka naguba og luoy'ng mga panimalay ug mga butang nga sama niana, kon diin ang matahum nga mga inahan nakigminyo sa palahubog nga amahan, ug mga butang nga ingon niana, ug abi nila nga aduna pa sila'y mahimo para nianang tawhana, ug karon ang tibukok pamilya lakip ang inahan nagainom-inom na hinoon ug kung unsa na lang ang ginabuhat. Tungod kini sa nakapalibot.

217 Unsa man kini? Ang yawa kini. Kini ang yawa, ang pagpanakup. Iya nang gisakup kini nga nasud, sama sa usa ka nagangulob nga leon. Gipahimutang niya ang iyang kaugalingon dinhi sa pinakamaayong dapit nga anaa sila, sa Hollywood. Ingon niya, "Mahimo kong dalhon ang mga salida dinhi hangtud nga mapasalida kini sa telebisyon, dayon makontrolar ko na sila." Ug maglingkod-lingkod na lang siya didto.

218 Ug ang mga miyembro sa iglesia, imbis nga ipasira ang mga sinehan ug dili pahanugotan ang mga anak nila nga moadto, ginahatagan na hinoon nila sila'g napulo ka sentimos pag-Dominggo sa hapon ug ginapaadto sila didto, aron sila pud makadula'g baraha, makalaag-laag ug makalibod-suroy. Oh, pagkamakauulaw gayud. Karon paandaron na lang nila ang telebisyon ug makatan-aw na sila og tanang mahugaw, dunot nga mga kabuang nga anaa sa kalibutan, diha niini. Husto kana.

219 Wala man ko'y supak sa salida. Wala pud ko'y supak sa telebisyon. Apan supak ko niadtong dunot nga mga butang nga anaa niana. Mao kana kung unsa kini. Kung gipabilin lang unta ninyo kini nga moral, nagpabilin pud unta kana nga moral.

220 Dili na ka makabaligya og kinaraan nga de-liston nga mga sapatos, dinhi sa lungsod, karon. Dili na ganahan ang mga kababayen-an niana. Gusto nila kadtong nakagawas ang mga tudlo sa tiil. Kay mao na man kana ang ginabuhat sa tanang uban pang mga babaye. Tinuod kana.

221 Kung moadto ka sa simbahan, dili na nimo sila matanyagan sa kinaraan nga relihiyon, tungod kay, ang ubang babaye, dili na siya, dili, dili na niya gustong magkaaduna pa og unsa man nga kahilambigitan niana. Dili na, sir. "Dili na kinahanglan nga moadto pa ko didto. Basta mitoo lang ko, kana ra man." Oh, igsoon, ang yawa nagatoo, usab. Husto. Maghinulsol kamo kay kon dili mangalaglag kamo.

222 Karon, pasayloa ko; dili, wala ko gituyo. Dili, wala ko gituyo. Dili, ginabawi ko kana. Gihigugma ko ang mga tawo. Apan ingon-ana ang akong—akong—akong—akong gugma kaninyo nga dili nako maantus nga makita kamong gapaingon sa kalaglagan nga sama niana. Kon itugot sa Dios, hisgotan ko kini sa ubang higayon niining semanaha.

223 Karon, kaninyong mga inahan nga nagpaka-inahan gayud, usa lang ka pulong alang kaninyo sa dili pa ta mopauli. Panalanginan kamo sa Dios. Padakuon n'yo ang inyong mga anak nga tarong.

224 Padayonon nato kining pagpanakup; kinahanglan pa natong hisgotan ang mahitungod sa mga panimalay, ug mahitungod sa daghan pang mga lugar, sa mga eskwelahan, ug sa ubang mga lugar. Ato nang ipadayon kini.

225 Pero, ang pagpanakup sa Estados Unidos, gidumalahan na siya sa yawa. Ayaw mo kahadlok sa Rusya. Walay kahilambigitan niini ang Rusya. Kita mismo ang nagabuhat niini, ang ato mismong pagkadautan sa atong taliwala. Husto kana.

226 Kabalo mo, nga mas daghan pa'y kaso sa diborsyo ang Estados Unidos kaysa tanang uban pa sa kalibutan? Mas daghan dinhi ang mga diborsyo; hunahunaa n'yo kini. Ingon-ana ba gyud ka makalilisang? Naguba na man gud ang pagka-inahan. Ang mga inahan ayaw nang magpuyo sa balay para atimanon unta ang ilang mga anak, sama sa ilang ginabuhat kaniadto. Kinahanglan nga aduna na sila'y trabaho.

227 Dinhi niadtong miaging adlaw, dihay usa ka magbabaligya'g mga makaon niining siyudad, nga akong gikaistorya bahin niini. Aduna kono'y mga babaye nga nagatrabaho niining mga pampublikong planta, mga batan-ong babaye nga minyo na nga aduna na'y gagmay'ng mga anak. Nagkuha sila'g mga yaya aron mao'y moatiman sa ilang mga anak. Samtang nagtrabaho sila niining mga lugar sa lungsod. Miingon, "Adunay duha kanila nga nagtindog didto, niadtong gitangtang sila sa trabaho, sa ilang pampubliko nga trabaho, miingon, 'Ayaw kabalaka. Makasugakod ra kita, sa unsa mang paagi.'"

228 Oh, grabeng panahon sa prostitusyon ang haduol nang mahitabo. Sigurado. Gipatoo sila sa yawa nga sila kono ang ulo sa panimalay. Makakuwarta sila sa ilang kaugalingon paningkamot. Mahimo na kono nila ang unsamang gustohon nila. Ug sige sulayan daw ninyo'g kuha niini sa ilaha, kung mahimo pa ba ninyo.

229 Adunay usa lamang ka butang nga makatangtang niini gikan kanila, kana mao ang altar, sa atubangan ni Jesus Cristo, sa usa ka kinaranaan, nagapaluha nga relihiyon nga modugmok sa ilang mga kasingkasing ug magkondena kanila, ug himoon sila sa kung unsay kinahanglan nga mamahimo sila. Husto kana.

230 Kinaraan man ang ilang tan-aw sa ako. Pero sa adlaw nga ikaw mamatay na, igsoon kong lalaki, igsoong babaye, maamgo gyud ninyo nga ang akong gisulti sa inyo mao'y Kamatuoran. Husto kana.

231 Padayon siya, sa pagpanakup, ania na ang maong takna. Karon, karon, oo, usa kini ka takna sa pagdesisyon, usab, usa kini ka takna sa pagdesisyon, dili aron nga magtambong sa simbahan, kondili takna na sa pagdesisyon kung moalagad ba gyud kamo kang Cristo o magpabiling dagaang sulod sa inyong iglesia. Ug husto kana.

232 Adunay daghang mga miyembro sa simbahan. Kung ang tanang miyem . . . o ang mga lungsoranon sa America nga nag-angkon nga mga Cristohanon, tinuod lang nga mga Cristohanon, mga natawo na pag-usab nga mga Cristohanon, igsoon, mahimong luwas unta kita sama sa kung atua na kamo sa Langit, halos, luwas gikan sa mga gubat ug mga kasamok, oo, sir, mobiya na ang mga balatian sa nasud, og ang tanang uban pa.

233 Dili ba nindot unta nga inig maglakaw ka sa kadalanan ug diha pu'y molabay nga usa ka gining, ug lalaki, "Kumusta ka, igsoong babaye? Maayong buntag, igsoong lalaki"? Magalakaw, nga walay . . . Nga wala ka'y bisan unsa nga kabalaka. Og maayo ra kaayo ang tanan. Ug kadtong tawo nga nagabiyaheng paliko na sa likoanan; imbis nga ligsan ka niya, mohunong unà siya, moingon, "Sige, igsoon. Bueno, sige ikaw unà . . . Oh, ikaw unà ayha ako," nakita n'yo, mas gustohon niyang . . . Dili ba maanindot kana? [Nagaingon ang kongregasyon, "Amen."—Ed.] Magkaaduna ra kita niana, pero sa Milenyum pa kana, igsoon. Haduol na ang maong Adlaw. Husto kana. Busa karon dili na kita . . .

234 Nagtindog ako dinhi sa atoang lugar, niadtong miaging adlaw; wala man ko'y bisan unsa nga batok sa atong kasilinganan, pero namatikdan nako ang atong gagmay'ng mga anak. Naghilak akong asawa. Usa ka doktor niining lungsod, ang iyang gamay'ng anak nga babaye nagauban-uban sa akong gamay'ng anak nga babaye, ug palangga nila ang usa'g usa; hangtud nga nahibaloan nila nga Branham diay ang iyang apelyido, ug siya'y anak ni Rev. Branham. Mao na dayon kadto. Dili na puede makig-uban kadtong gamay'ng babaye sa akong anak. "Grabe," sa hunahuna ko, "bueno, okey lang."

235 Ang uban sa among mga silingan miadto didto, miingon, "Bueno, okey lang kana." Dayon, miadto diay sila sa ilang pastor. Bisan og dili mo magsulti sa ako. Kabalo mo, ako—aduna ko'y paagi nga mahibaloan ang daghang mga butang, nakita n'yo. Busa sila—miadto sila sa ilang pastor, ug miingon, "Kabalo ka, adunay usa ka lalaki nga nagpuyo duol sa amoa, nga buotan kaayo sa among mga anak." Miingon, "Kini si Rev. Branham.

Gitigum niya sila, ginapasakay sila sa gamay'ng karaan niyang trak, ug ginasuroy sila sa gawas."

²³⁶ Miingon, "Bueno, uh, *Ahem!* Wala man ta'y supak kang Rev. Branham. Maayo man siya, pero, nakita n'yo, lahi ra siya nga klase nga tawo kaysa kung unsa kita." Oo. "Kita, akong—mas gusto nako kung dili ninyo . . . kabalo mo, medyo dili ko . . . Puede man nga makig-istorya mo sa ilaha, ug magmahigalaon gihapon, pero hangtud ingon-ana na lang."

²³⁷ Oh, igsoon! Nagtindog ang akong asawa didto, nga naghilak intawon. Miingon ko, "Palangga, usa kini ka utlanan nga nagapahimulag. Alang kanako ug sa akong panimalay, kita moalagad sa Ginoo."

²³⁸ Bisan pa'g magun-ob ang tibuok kalibutan; si Jesus Cristo gyud sa gihapon! Bisan og tawgon ko nila'g usa ka panatiko, bisan pa'g likayan ko sa akong mga paryen . . . sa akong isigkatawo, ug mga butang nga sama niana, pilion gihapon nako si Jesus Cristo. Magkupert sa dili-mausab nga kamot sa Dios. Kung talikdan man ka sa mga higala mo sa kalibutan, nan mas hugtan mo pa ang pagpanghawid Kaniya. Hawid gyud Kaniya.

²³⁹ Dios, tugoti ako sa pagsangyaw nga wala pa nako mabuhat kaniadto. Tugoti ako nga magwali sa himalatyon nga mga tawo, ingon nga ako usa pud ka himalatyon nga tawo, usab. Tugoti ako sa pagwali sa mga tawo nga daw sa pinakaulahi na kini nga wali nga akong igawali. Tugoti ako nga maaghat sila sa pagduol sa altar, nga ang ilang mga nawong ginadagaydayan sa luha; mopauli sa ilang panimalay ug magkinabuhi ingon nga mga Cristohanon na, ingon nga lomulupyo sa ilang lugar. Hunongon na kining tanang tiawtiaw ug paghudyaka, ug paglukso-lukso ug mga binuang; ug nagalihok nga sama *niini*, ug pagkasuko tungod lang *niini*, ug nagakahimong ingon *niana*. Oh, ayaw buhata kana. Ang yawa kana. Sila nga mga espiritu sa demonyo nagaanha usab sa mga Cristohanon.

²⁴⁰ Hinumdumi n'yo, kadtong mga ministro didto, sila kadtong mga propeta didto. Sila'y mga propeta. Relihiyoso sila nga mga kalalakin-an nga nagahalad og sakripisyo. Sama ra sila ka relihiyoso sa mga magtutudlo karong panahona, pero, igsoon, layo ra kaayo sila sa pagkahibalo sa kamatuoran.

²⁴¹ Wala ba ninyo makita kung unsa gayud ka relihiyoso ang yawa? Ang yawa dili anti-, nga daku kaayo nga butang nga sama sa komunismo, nga hingpit nga batok gyud sa Cristianismo. Dili ingon niana kini. Kana'y, oh, bueno, iya kana sa yawa, sigurado, apan dili kini mao ang anticristo. Relihiyoso kaayo ang anticristo, relihiyoso kaayo. Usa ka relihiyosong espiritu ang naglansang kaniadto kang Jesus. Sa una pa'y usa na kini ka relihiyosong kalibutan, usa ka relihiyosong mga tawo, ang nagalansang sa krus. Mga relihiyosong tawo man ang batok kaniadto sa tinuod nga Cristo. Mga relihiyosong propeta ang

batok kaniadto kang Micheas. Mga relihiyosong tawo pud niining panahona ang batok sa Mensahe sa Dios.

²⁴² Hinumdumi ninyo, gipasidan-an ko na kamo. Gisultihan ko na kamo. Wala ko maghisgot bahin sa Katolisismo, ug mga Baptist ug Methodist; ang akong ginahisgotan mao kanang mga tawong holiness, kanang mga grupoha. Tan-awa n'yo kini sa karon, kung giunsa niini pagsulod ug naapil nianang mga drama. Oh, grabe. Mahunahuna ko kini, usahay. Ug nagakasubo gayud ang akong kasingkasing sa sulod nako.

²⁴³ Nagatindog didto hawid ang usa ka karaan nga banjo, ginakaskas kana nga banjo, ug ginapatugtog ang usa ka karaang biyolin nga ingon niana, “Si *Ingon niini-ug-ingon niana* ba kini nga cowboy sa Texas?” Wala man ko’y bisan unsa nga batok nianang tawhana; apan iya kana sa kalibutan. Husto kana. Mas pilion ko pa nga motindog, igsoon, nga wala’y gihawiran og bisan usa ka butang, nga unsa man, nga wala gyud, nga igo lang magtindog ug magpataas sa akong mga kamot ug moingon, “Jesus, ipaduol ako kanunay sa krus.” Oo, sir.

Kining balaang krus akong pagapas-anon,
Hangtud nga ipalingkawas ako sa kamatayon,
Dayon Makapauli na nga sul-obon ang
purongpurong,
Kay ma’y usa ka purongpurong alang kanako.

²⁴⁴ Kaninyo nga mapinaubsanong mga inahan dinhi karong buntaga, nga nagpaka-inahan gayud, ug kabalo ko nga daghan pa kamo; sa hunahuna ko, ang matag usa kaninyo. Sultihan ko kamo og usa ka butang. Panalanginan kamo sa Dios. Kamo ang ikalima nga Ebanghelyo, sa tan-aw ko. Tugoting isulti ko sa inyo karon nga para man pud sa inyong mga anak, nga usa ka gamay lang nga butang. Tungod kay, igawali siguro ni Igsoong Neville ang mahitungod sa . . . mahitungod sa inahan karong gabii, o kung kinsa man, usa kanamo ang magawali, bueno, mahitungod sa inahan. Pero, paminaw, kay duna ko’y isulti kaninyo.

²⁴⁵ Hinumdumi n’yo, niadtong bata pa si Moises, usa ka inahan ang nagmatuto kaniya. Usa ka diosnon nga inahan nga nagsabak sa gamay’ng Moises sa iyang mga tuhod, ug miingon, “Moises,” gitudloan siya sa tanan-tanan. Nahimo siyang iyang magtutudlo, o, siya ang magtutudlo ni Moises, ang pasabot ko, sa poder ni Faraon, ug miingon, “Karon, kining mga butanga,” miingon, “Moises, moabot ang adlaw nga imong pagaluwason ang mga anak sa Israel. Ikaw ang bata nga tinawag. Ipabilin nga putli ang imong kaugalingon ug dili ka mahugawan sa kalibutan, tungod kay ikaw man kana. Ikaw ang magaluwas.”

²⁴⁶ Walay dapit nga atong nahibaloan, diin nag-eskwela siya sa unsa man nga seminaryo, o unsa mang panudlo, nga iyang gibatonan. Nagpabilin siya mismo sa palasyo ni Faraon, nga usa ka pagano; apan ang iyang inahan mao ang nagmatuto kaniya.

Mao kana ang usa ka tinuod nga inahan. Gitudloan siya sa iyang inahan sa mga lagda sa Ginoo. Gisaysay sa iyang inahan kung unsa nga kinahanglan niya nga mamahimong balaan. Gisaysay sa iyang inahan kung unsaon ug unsay iyang angay'ng ikinabuhi, ug kung unsaon, kung unsa ang kinahanglan buhaton sa Dios, o pagabuhaton alang kaniya. Ug nagpabilin gyud kadto kang Moises sa tibuk niyang kinabuhi.

²⁴⁷ Ug ang si kinsa man nga buotan, tinuod, nga matitud-anong inahan nga sabakon ang iyang gagmay'ng mga anak, imbis nga tugtan sila nga motan-aw og mga salida ug moadto sa mga sayawan, ug uban pa nga ingon niana, ug sabakon niya sila ug tudloan sila mahitungod sa Ginoong Jesus Cristo.

²⁴⁸ Niadtong miaging adlaw dinhi, gikaistorya ko ang usa ka inahan diha sa telepono. Ug miingon kadtong inahan, "Oh, Igsoong Billy," ingon pa niya, "adunay problema ang makaloolooy kong anak nga lalaki." Miingon, "Oh, pagkadaku sa iyang problema."

²⁴⁹ Miingon ko, "Oo, kabalo ko niana, pinanggalang, igsoong babaye." Ug ingon niya, "Tingali nasayop siya. Wala ko kabalo." Miingon, "*Ingon-ani* man gud ang gisulti sa usa ug *ingon niana* sàb sa usa. Wala ko kabalo. Pero," miingon pa, "bisa'g sayup pa siya o husto man, palangga ko siya." Ingon niana, "Palangga ko siya."

²⁵⁰ Miingon siya sa iyang inahan, "Nailad gyud ko *niini* ug *niana*." Miingon pa, "Mama, sigurado kong ikaw na lang gyud ang akong pinalangga; usa ka babaye nga matitud-anon kanako, ug dili mobiya kanako." Ingon-ana ang gugma sa inahan. Ingon-ana ang usa ka tinuod nga inahan nga mogakus sa iyang anak. Bisan pa kung husto man o sayup ang anak, kanunay'ng anaa sa kiliran ang inahan. Ug kung ang Dios. . . Kung ingon-ana man gani ang paghunahuna sa usa ka inahan para sa iyang anak, unsa pa kaha ang paghunahuna sa Dios para sa Iyang mga anak. Nakita n'yo? Maong magpabilin kamong matitud-anon Kaniya. Pagkinabuhi nga matarung.

²⁵¹ Ug karon sultihan ko lang kamo og usa pa ka inahan, kadali lang, diha sa Biblia, sa dili pa nato tapuson. Dihay inahan nga ginganla'g Herodias. Gitudloan niya'g sayaw ang iyang anak nga babaye. Gusto niya nga mahimong inila ang iyang anak nga babaye. Ug kini misayaw atubangan sa hari, ug gipangayo ang ulo ni Juan Bautista. Aduna kita'y rekord mahitungod sa setenta sa iyang mga kaliwat, niining dalaga nga nagsayaw atubangan (kadtong anak nga babaye ni Herodias), nga misayaw sa atubangan ni Herodes; setenta sa iyang mga kaliwat, nga nangamatay nga mga bigaon o sa mga bitayan.

²⁵² Usa ka inahan nga nagtudlo sa iyahang anak og pangkalibutanong mga butang; samtang ang usa ka inahan nagtudlo sa iyang anak og mga butang nga iya sa Dios. Ang usa nahimong

bantugang lider ug magdadaug, nga gidumdum gihapon sa mga tawo hangtud karon; ug samtang ang usa nagpatuyang sa kaulagan ug anaa na sa impiyerno, ug gidala ang linibo ka pilo nga mga linibo uban kaniya. Nasabtan n'yo ba ang buot kong ipasabot? “Matutoa ang usa ka bata sa dalan nga angay niyang pagalaktan.”

²⁵³ Ug nakigduyog ako sa inyo nga mga inahan nga ania karon nga nagbutang og puti nga mga rosas. Adunay usa ka Langit nga ginapadulngan sa usa ka inahan, karon, kon diin ang usa ka maayo nga maka-kinaraan nga inahan nga nagkinabuhi alang sa Dios, mahimong milabang na sa luyo sa tabil. Naghulat siya sa imong pag-abot. Husto kana.

²⁵⁴ Ginatahud ko ug ginapasidunggan usab kamo dinha nga mga nagbutang og pula nga rosas. Ang inyong inahan, kung aduna man kamo'y gustong buhaton alang kaniya, buhata kini sulod sa tulo ka gatus ug saisenta'y-singko ka adlaw sa usa ka tuig. Bisitahi siya sa iyang balay ug maghalad og pag-ampo, ug magkinabuhi alang sa Dios. Mao kana ang butang nga angay buhaton. Ug matuto-a ang inyong mga anak. Ug kung modaku na ang inyong mga anak, pagatawag ka nila'g “bulahan,” human nga milabang na kamo luyo sa tabil. Mao kana ang tinuod nga ideya mahitungod sa pagka-inahan, ang tinuod nga ideya mahitungod sa adlaw sa mga inahan. Ang adlaw sa mga inahan mao'y tulo ka gatus ug saisenta'y-singko ka adlaw sa usa ka tuig.

²⁵⁵ Kini ang adlaw nga namaligya sila og mga bulak ug nagahatag og mga regalo, mao kana ang ginabuhat sa kalibutan. Kung magdugay pa, kung molungtad pa og dugang nga baynte ka tuig ang kalibutan, magkaaduna na sila'g mga adlaw sa anak nga lalaki, mga adlaw sa anak nga babaye, ug, mga adlaw sa mga ig-agaw, ug mga adlaw sa mga uyoan, ug tanan nang mga butang nga sama niana, igo ra aron mapahimutang ang kalibutan sa usa ka madanihon nga pagpamaligya. Mao kana ang kapaingnan niini, paingon mismo sa impiyerno, sa ingon ka paspas, padulong sa kalaglagan.

Pero, kamo, panalanginan kamo sa Dios, mao'y akong pag-ampo. Mag-ampo kita.

²⁵⁶ Among buotan og Langitnong Amahan, samtang among gihandum, niining kabuntagon, sa among mga hunahuna, ang kaniadto, mga gatusan ka tuig na ang milabay, niadtong nagbarug si Josaphat didto sa kiliran ni Haring Ahab. Ug adunay usa ka Espiritu sulod sa iyang kasingkasing, nga nahabilin pa gihapon para sa Dios, bisan og nasayup siya, nga nagsulti kaniya, miingon, “Sayup kini. Sayup kini. Dili kini limpyo. Dili kini balaan. Gisulti na sa propeta kining mga butanga nga dili mahimong magpadayon nga ingon niini.” Ug gipukaw siya sa gamay'ng Kalayo sa Dios.

²⁵⁷ Ug dayon aduna Ka'y sulugoon nga mitubag niadtong gamay'ng Kalayo, nga mao si Micheas, ang tinuod nga propeta sa Dios. Bisan og miadto siya didto nga nagsul-ob og trapo, bisan og miadto siya didto nga gitamay, ug silang tanan nagtan-aw kaniya ingon sa usa ka pundok sa mga lobo nga nagatan-aw sa usa ka nating karnero. Pero gisulti gihapon niya ang kamatuoran, bisan og nasagpaan pa siya sa nawong, bisan og ibalhog pa siya sa bilanggoan ug pakaonon og tinapay ug tubig sa kagul-anan. Pero, bisan pa niana, ang mga pulong nga iyang gisulti natuman, kay nagauban man Ikaw kaniya.

²⁵⁸ Dios, itugot, karon, nga kining Biblia ang among tan-awon. Ang ginatan-aw man gud namo mao ang mga basahon sa iglesia, mga sugo, ug uban pa, nga iya sa mga iglesia, mga seremonya, ug ginatan-aw kung giunsa nila pagbuhat *niini, niana*, o kung unsang *uban pa*. Pero itugot nga magatutok lamang kami niining tinuod nga Pulong dinhi, ug tan-awon kung unsay ginaingon Niini: “Kung walay pagkabalaan, walay tawo nga makakita sa Ginoo. Paninguhaa ninyo ang pakigdait ug pagkabalaan, nga, kung wala kini, walay tawo ang makakita sa Ginoo. Siya nga nahigugma sa kalibutan, o sa mga butang nga iya sa kalibutan, ang gugma sa Dios wala gyud diha kaniya.”

²⁵⁹ “Sa kaulahiing mga adlaw managpangabot ang mga panahon nga malisod. Kay ang mga tawo unya mga magamahigugmaon man sa ilang kaugalingon, palabilabihon, mga hambogiro.” Oh, kanang mga dagkung butanga, Ginoo, nagakahitabo na gayud. “Mga gahig-ulo, mapahitas-on, mga mahigugmaon sa kahilayan labaw pa sa pagkamahigugmaon sa Dios; nga ginatudloan ang mga tawo sa mga tawhanong mga lagda sa—sa mga tawo imbis nga mga sugo sa Dios; nga nagabaton og dagway sa pagkadiosnon, ug nagapanghimakak sa gahum sa Espiritu Santo” aron unta mapuno og Espiritu ang usa ka tawo, aron magmaya siya, aron modagayday ang mga luha sa iyang mga mata, aron molakaw siya ug magaampo alang sa masakiton, aron magsulti siya og mga pinulongan ug magahubad, aron magapropesiya siya. Ang Espiritu sa Dios, ang buhi nga Dios, ila Kining gitangtang og nahimo na lang og usa ka kapunongan o usa ka ingon niana, “Nga nagabaton og dagway sa pagkadiosnon, ug nagapanghimakak sa gahum niini.”

²⁶⁰ Oh Dios, hinaut nga kining diyutay'ng mananambong, niining adlaw, mahigmata sa gilayon, karon mismo, sa dili pa moabot ang katapusang panahon, ug maabtan kami sa niini nga kahintang. Hinaut nga kami, magbag-o sa among kaugalingon, sama sa giingon sa Biblia, “Bangon ug tay-oga ang inyong kaugalingon. Ug pangutan-a kung asa ang daang dalan, nga mao ang maayong dalan, ug kung makaplagan na nimo kini, lakaw ka niini.” Dios, itugot nga among makit-an ang maong karaang malisud nga dalan, sa dihang magkauban kaming magabarug

pag-usab, ingon nga gatusan, ug maghinawiray mi sa among mga kamot ug magaaawit kami.

Pagapilion ko ang dalan kauban sa pipila ka mga tinamay nga iya sa Ginoo.

Nakasugod na ako diha kang Jesus ug mopadayon gyud ako.

Dios, tabangi kami sa pagkinabuhi niana ug mahimong ingon niana.

²⁶¹ Panalangini kining tanang pinalangga nga mga inahan nga nagalingkod dinhi, Ginoo; sa pagkahibalo nga sila mga inahan, mismo, nga adunay puti nga mga rosas nga gi-alperilan sa ilang mga kupo, karong buntaga, isip usa ka pagdumdum sa usa ka minahal nga tigulang nga inahan nga mitabok na ngadto sa pikas kinabuhi. Oh Ginoo sa Kinabuhi, panalangini sila, Ginoo. Ug hinaut nga mapanalanginan sila, usab, ug hinaut nga ang mga paghandum sa ilang mga anak mahisama sa ilang mga paghandum usab sa ilang inahan, kung mitabok na kini ngadto sa luyo sa tabil, ngadto sa mahimayaong Langit. Itugot kini, Ginoo.

²⁶² Ug pagmoabot ang usa ka buntag nga mohunong na ang kinabuhi gikan sa among mga ugat, ug mawagtang na among mga gininhawa, ang tabil mobalik og abli; moadto siya, tingali, ngadto sa tumoy sa Jordan, aron tabangan kami sa pagtabok. Oh, nianang mahimayaong adlaw sa dihang amo nang itunob ang among mga tiil didto, diin wala na'y . . . Dili na kontaminado ang hangin sa aso sa sigarilyo. Wala na'y palahubog sa kadalanan. Wala na gayu'y bigaon. Wala na'y sala. Wala na'y butang nga sama niana. Pero, didto sa mahimayaong kahangturan, magkinabuhi kami nga malinawon uban sa among Ginoong Jesus Cristo ug sa among mga anak. Ug, oh, pagkaanindot nianang adlaw.


²⁶³ Oh Amahan, samtang nagapadayon ang dakung kangitngit, ang pakiggubat, ug ang yawa nga ginasakup ang mga kanasuran, ug ginasakup usab ang mga pulpito, ginasakup ang mga kasimbahanan, ginasakup ang mga tawo, ginasakup ang mga negosyo, ginasakup ang mga siyudad, ug ang mga eskwelahan ug ang mga panimalay; Oh Dios, tabangi kami nga makabarug, nga mahulbot dayon ang espada ug makig-away alang sa Dios, sama sa gibuhat ni Moises ug sa—ug sa mga Levihanon didto niadtong nakasulod ang sala sa kampo kaniadto. Tabangi kami, Ginoo.

²⁶⁴ Pasayloa kami karon, ug panalangini kami. Ug ipapabilin kami nga mapaubsanon, dugmoka kami, Ginoo. Oh Dios, Ikaw miingon, “Siya nga nagaadto, nagapugas og mga luha, walay duhaduha nga magabalik pag-usab, nga magmaya, nga magadala sa iyang mga inani.” Oh Dios, dugmok-dugmoka kami.

Umula kami, pag-usab, Ginoo. Nahisalaag na kaayo kami palayo sa hustong dalan.

²⁶⁵ Ako, mismo sa akong kaugalingon, Ginoo, miabot na sa punto kon diin naghunahuna na ako kung pila kaha ang motabong sa akong panagtigum. Oh Dios, ang gipanguha ko nga Ikaw ang motabong. Umari ka, Ginoo! Oh Cristo, umari ka Ginoo! Dugmoka ako; umula ako pag-usab. Oh Ginoo, ayaw, ayaw gayud itugot nga mabutang sa akong hunahuna kanang mga butanga. Dios, ipahilayo ang mga niini kanako.

²⁶⁶ Tabangi ako, Ginoo, nga magawali, sama sa gikaingon ko, bag-ohay lang, sama sa usa ka himalasyon nga tawo ngadto sa himalasyon nga katawhan, sa pagkahibalo nga kaming tanan moatubang gayud sa Eternidad. Kinahanglan namong mobarug sa Imong atubangan; sa dihang Ikaw wala na sa Imong pagkamaloloy-on nga kinaiyahan, sa dihang wala na Ka sa kalooy, sa dihang Ikaw nagatindog nga wala na'y kalooy; sa dihang Ikaw nagatindog, sa kasilag, aron pagahukman ang mga kanasuran ug mga tawo nga nagsalikway ug gibalibaran ang gugma sa Imong Anak.

²⁶⁷ Dios, hatagi ko'g kalooy pinaagi Kaniya karon, aron ako makabarug nga may kasigurohan nianang Adlaw. Magatuaw man ako karon, pero Imong pagapahiran kini, pulihan og kalipay, nianang taknaa, sa dihang moingon Ka, "Sumulod ikaw ngadto sa kalipayan sa Ginoo, nga giandam alang kanimo gikan pa sa pagkatukod sa kalibutan." Dios, ubani kami karon, ug tabangi kami, mao'y among ginapangamuyo, sa Ngalan ni Jesus. Amen. 

54-0509 Ang Pagpanakup Sa Estados Unidos
Branham Tabernacle
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org